

**Señora a cay
den cas y
keda varios
ora na suela**

Monton di droga confisca

Siete persona indocumenta gara ta trata di drenta Aruba



ORANJESTAD (AAN): Diaranson marduga, radar marino a detecta un boto sospechoso nabegando den direccion di Aruba. Mesora Centro MOC di Wardacosta a laga saca un boto special Metal Shark, como tambe un avion a lanta vuelo pa bay vigila.

Na momento cu e oficialnan den Metal Shark a yega cerca, nan a tuma nota cu ta trata di un boto cu 7 persona riba dje. Den e boto tambe a mira diferente pakete abordo. Inmediatamente a intercepta e lancha y a bin cu ne bek pa Pier na Savaneta pa asina continua cu e caso. Ta trata di 7 hende homber indocumenta di nacionalidad Venezolano y un cantidad di droga cu nan a purba di hiba Aruba.

Tambe a pidi asistencia di e helicopter di Wardacosta pa ehecuta un control riguroso na diferente parti di costa di Aruba. Den un bon cooperacion hunto cu diferente departamento di Cuerpo Policial di Aruba, a logra di detecta y tambe recupera un cantidad di pakete den area Noordoost di Aruba. A entrega tur 7 individuo y tur droga na Cuerpo Policial. Miembro nan di Cuerpo Policial lo continua cu e investigacion y entretanto a logra di destrui tur droga.

Acuerdo di colaboracion cu ROC Mondriaan Hulanda

ORANJESTAD (AAN): Minister di Eñanza Gerlien Croes, a firma un acuerdo di colaboracion cu ROC Mondriaan di Hulanda. E firma aki ta marca un paso importante den e fortalecimiento continuo di educacion profesional y educacion practico continuo na Aruba.



Common Good Conference a cuminsa cu un gran asistencia y energia positivo

■ E conferencia a conta cu varios orador reconoci

- *Ex-Premier Balkenende y Govert Buijs tambe presente*
- *Expo di Bon Comun tambe tabata hopi bon bishita*


A firma MoU pa fortifica e Plan Nacional di Reforestacion



ORANJESTAD (AAN): Un otro momento importante durante di e conferencia di E Bon Comun, tabata e ceremonia di firmamento cu a tuma luga den cuadro di e Programa Nacional di Reforestacion di Aruba, un iniciativa cu tin como meta fortifica e sistema social-ecologico di Aruba mediante reforestacion y infraestructura berde urbano.

Pa e ocasion aki, e Prome Minister Mike Eman y Minister di Infraestructura Rene Herde, hunto cu un grupo amplio di partner di sector priva y institucional a firma un Memorandum of Understanding (MoU) pa confirma nan compromiso cu e causa. Entre e organizacionnan participante tabata Save More Supermarkets NV, ArubaBank, Aruba Wine & Dine Holding, Hospital Dr. Horacio Oduber, Eagle Aruba Resort, Jolly Holding, Pepe Margo y Bucuti & Tara Beach Resort.

E firmamento aki ta simbolisa un compromiso comparti pa inverti den un futuro mas berde y resiliente, unda cuido di naturalesa y bienestar di comunidad ta bay man den man. Pa medio di reforestacion y desaroyo di espacionan berde urbano, Aruba ta traha activamente pa fortalece su naturalesa y calidad



di bida.

Cu e MoU aki, gobierno y sector priva ta reafirma nan responsabilidad colectivo pa contribui na un Aruba mas sostenible, unda desaroyo, comunidad y naturalesa ta conecta den beneficio di e bon comun.

Charlotte McInerney encuanto enkelband...

Aruba ta lansa programa Smart Justice ‘Buddi’ pa monitoreo electronico den sistema hubenil

ORANJESTAD (AAN): Aruba a tuma un paso importante den modernisacion di su sistema di husticia cu e lansamento oficial di e programa di monitoreo electronico, Smart Justice “Buddi”, den sector hubenil. Señora Charlotte McInerney, Business Development Manager, a expresa su satisfaccion cu nan a wordo scogi pa brinda solucion y apoyo na Aruba den e iniciativa importante aki. “Nos ta hopi contento cu nos a wordo scogi pa brinda nos solucion y apoyo na Aruba pa e lansamento nobo di Smart Justice – Buddi. Cu mas di 20 aña di experiencia den monitoreo electronico, incluyendo den Caribe Hulandes, nos ta bon posiciona pa sostene e programa aki,” McInerney a bisa. E aparato Buddi ta procedente di un compania di Inglatera.

Introduccion di monitoreo electronico den sistema di husticia hubenil ta representa un paso progresivo cu ta enfoca riba supervi-

sion structura, responsabilidad y mehoracion di resultadonan di rehabilitacion. E programa ta destina pa fortifica efectividad di proceso hudicial, permitiendo hobennan cumpli cu condicionnan imponi door di corte bou di supervision monitoria.

Buddi ta opera internacionalmente den Caribe Hulandes, Reino Uni, Europa, Merca, Australia y New Zealand, brindando servicicionan basa riba mas di dos decada di experiencia. “Nos ta spera di mira progreso positivo cu e proyecto aki lo trece pa Aruba, McInerney a enfatisa.”

Señora McInerney a reconoce tambe e colaboracion di Señora Pemberton-Leonard, cu tabata instrumental den e realisacion di e iniciativa importante aki.

Cu un team local fuerte y apoyo tecnico internacional, Smart Justice “Buddi” ta aspira di contribui na resultado positivo pa e sistema di husticia di Ar-



uba y sigui alinea cu standardnan moderno di supervision. E lansamento aki ta den evolucion continuo di husticia na Aruba.

Rey Willem-Alexander a papia cu Gobernadornan di Aruba y Corsou y gezaghebber di Bonaire

ORANJESTAD (AAN): Su Mahestad Rey a combersa telefonicamente cu Gobernador di Aruba, Su Excelencia J.A. Boekhoudt, dialuna anochi, dia 26 di januari; cu Gezaghebber di Bonaire, Su Excelencia J.R.E. Soliano, riba diamars anochi, dia 27 di januari; y ayeratardi, dia 30 di Januari, cu Gobernador di Corsou, Su Excelencia Sr. M.J. de Kort.

Regularmente Rey ta papia cu autoridadnan den e parti Car-



ibense di Reino pa haya informacion. E biaha aki, e discusionnan a enfoca riba e impacto riba e islanan di e eventonan na Venezuela cercano.

Gemeenschappelijk
Hof van Justitie

Werving & Selectie

Het Gemeenschappelijk Hof van Justitie, vestiging **Aruba**, zoekt enthousiaste kandidaten voor de functie van **HR Adviseur**.



Bent u geïnteresseerd?

Voor meer informatie, scan de QR-code of bezoek ons sollicitatieportaal:

Werken bij het Hof op www.ghvj.org.

Common Good Conference a cuminsa cu un gran asistencia y energia positivo



ORANJESTAD (AAN): E Common Good Conference a cuminsa oficialmente cu un audiencia hopi entusiasma, y hendenan ansioso pa ta parti activo di e movimiento pa e bon comun. For di comienso, e atmosfera a mustra un sentido comparti di proposito, conexon y compromiso cu balornan cu ta pone hende y comunidad central.

E conferencia a habri cu un bendicion significativo di Pastor Grandt, cu a marca un tono inspirado y di reflexion. Despues di esey, Minister di Turismo, mr. Wendrick Cicilia, a duna palabranan di apertura, subrayando e importancia di cooperacion, responsabilidad comparti y vision a largo plazo pa construi un sociedad basa riba e bon comun.

E programa a sigui cu e prome ponencia oficial di Dr. Jelle van Baardewijk, kende su aporte a invita e publico pa pensa critico, participa activamente y asumí responsabilidad pa nan rol den forma un futuro mas husto y mas humano.

E mainta a sigui cu un presentacion di Esther Emerencia-Gomes, directora

di Post Aruba, cu a haci referencia na su welo cu a bin den boto chikito for di Guajira Colombia sin nada, a establece su mes na Aruba y a keda nenga un hipoteca pa traha su cas. E comunidad di e tempo ey, a compronde e situacion cual hopi tambe a biba, a bin hunto y como un comunidad, a yuda su welo construi nan cas. Esey tabata e espirito di e Aruba di antes, den cual e sentido di yuda otronan, tabata fundamental.

Despues di e presentacion aki, Dr. Ad Verbrugge a duna su presentacion filosofico haciendo referencia na Aristotle, cu ta indica cu e bon comun ta e proposito principal di un ciudad of sociedad. E bon comun ta trata di e bienestar comparti di tur hende, unda hende ta actua hunto como un solo comunidad, guia pa husticia, respet mutuo y amistad, y no solamente pa interesnan individual.

Na final di e session di mainta, a sigui cu un interaccion interesante entre e publico y panelistanan den cual a inspira esnan presente pa forma parti di e movimiento di e bon comun.





Cuminsando cu 4 florin, bo por gana e suma grandi aki

Afl.

130.000,-

Obtenibel na cualkier rebendado di Lotto.

sorteo ta awe nochi 7:45 pm



HUNGA AWO



Door cu Hues no ta haya proba maltrato severo

Cinco aña di prison pa homber cu a secuestra, viola y maltrata su señora



ORANJESTAD (AAN): E homber B.(44) ayera mainta a scucha Hues conden'e na 5 aña di prison. Den sala di Corte tabata presente e señora V., kende ta e victima di

B. Por a mira cu el a cuminsa yora, ora el a tende e sentencia.

FISCAL

Dia 9 Januari 2026 tratamento di e caso a tuma lugar ca-

minda Fiscal a bisa Hues cu e adiccion di B. a causa cu e drama a sosode 10 Augustus 2025. B. tabata blo kier tin relacion sexual y V. tabata nenga. Dia 10 Augustus 2025, B. a bay te na trabao di V., gar'e, lastr'e, hink'e den auto. Na e cas di B., V. a wordo viola y maltrata. Fiscal ta haya cu e maltrato ta severo y potret ta muestra esey bon cla. V. mester a keda 5 dia interna den hospital pa hemorragia cerebral. B. a dal V. cu forza diferente biaha na cara. Fiscal ta haya cu B. a tacha e integridad di V. kende a keda afecta y awor ta wardando pa haya tratamiento di psicologo. Nan yunan tambe a keda afecta. Pa cu castigo, Fiscal a bisa cu e ta tene cuenta cu ta promer biaha B. ta cay den man di husticia. Fiscal a exige 7 aña di prison, kitando e tempo cu B. ta sera. Fiscal a bisa cu e ta tene cuenta cu e peticion di V., pa B. haya tratamiento. Fiscal ta kere cu ora yega e momento di libertad condicional, lo bay atende cu esaki. Pa loke ta e demanda di daño di 15 mil Florin, Fiscal ta haya cu ainda V. mester di tratamento. Fiscal ta pidi Hues pa aproba e demanda y pone medida di pago. Tambe

Fiscal a exige pa B. paga e demanda di 300 florin pa e celular di V. cu B. a kibra.

NO CULPABEL DI MALTRATO SEVERO

Hues a bisa cu e ta haya B. no ta culpabel di maltrato severo. Hues a bisa cu for di potret, relato medico por a compronde cu e maltrato no tabata asina grave. Hues a declara B. liber di e acusacion di maltrato severo.

CULPABEL DI MALTRATO, VIOLA Y SECUESTRO

Hues a rechaza e defensa di abogado, kende a bisa cu Hues mester declara B. liber di a viola su señora V. y secuestro. Hues ta haya legalmente proba cu B. a viola e señora V. Hues a bisa cu e ta haya e declaracion di V. y testigonan ta muestra cu tabatin violacion, secuestro y maltrato.

Hues a bisa cu e ta haya proba intento di maltrato severo.

Hues a rechaza e defensa di abogado cu B. a actua den defensa propio contra V. cu a

atak'e. Hues ta haya cu ta B. a agredi e señora V. y e señora V. mester a defende su mes.

CASTIGO

Hues a bisa cu esakinan ta hechonan serio. Hues a bisa cu pa cu e castigo, e ta tene cuenta cu ta promer biaha cu B. ta cay den man di husticia. Hues ta tene cuenta cu orientacion di castigonan cu Hof ta duna pa casonan asina.

Hues a bisa cu door cu e no a haya maltrato severo proba, e no ta sigui Fiscal su exigencia di 7 aña y ta baha e castigo.

Hues a condena B. na 5 aña di prison, kitando e tempo cu e ta sera den KIA. Hues tambe a ordena pa B. paga e 300 florin di a kibra e celular y e demanda di daño material di 15 mil florin. En total B. mester paga e señora V., 15.300 florin. Hues a pone e medida di pago. Esey ta nifica cu B. lo mester paga via Ministerio Publico e suma di 15.300 florin y Ministerio Publico lo percura pa e señora V. haya e placa.

Hulanda a bay di acuerdo cu nombramentonan den Cft



ORANJESTAD (AAN): Consejo di Minister di Reino a bay di acuerdo cu e nombramento di prof. dr. Paul Hilbers como miembro nobo di e tres Colegionan, riba proposicion di Hulanda. Señor Hilbers ta sucesor di señor Hans Hoogervorst. Anteriormente, riba 31 di october 2025, Consejo di Minister (di Reino) a nombra drs. Hans Hoogervorst como Presidente di e tres Colegio di supervision financiero (Cft), como sucesor di Lidewijde Ongerling, kende a ocupa e funcion di Presidente pa tres aña. Tanto Paul Hilbers como Hans Hoogervorst ta cuminsa den nan funcion nobo entrante prome di februari 2026.

Despues di a studia matematica na Rijksuniversiteit Utrecht y econometria y economia internacional na Vrije Universiteit Amsterdam, Paul Hilbers a desaroya un carera den sector financiero. Den e periodo ey, e tawata asocia pa hopi tempo na Nederlandsche Bank, entre otro como Director di Supervision di Politica y Director di Stabilidad Financiero. Presidente saliente Lidewijde Ongerling ta desea tanto Hans Hoogervorst como Paul Hilbers hopi exito den nan funcion nobo.

MAESTRO BENJAMIN

Mi tin e don e capacidad y e conocimiento pa cuba tin e cura pa bo malesa. No ta importa con difcil o extraño cu e por ta. Si abo ta un di e persona nan aki, bo no por drumi o bo ta sinti dolor di cebaz. Door di bariga o bo no por cana. Mi ta un experto den cura e enfermedad nan aki y hopi mas den poco tiempo. Bo ta hunga loteria. Casino y bo no ta gana, cu e ayudo del maestro Benjamin bo suerte lo cambia. Domino y amaro na bo pareja. Novio esposo o persona di bo mes un sexo sin importar tempo y distancia y cu seguridad e ta bolbe rendi na bo pia pidibo pordon, resultado 100% efectivo y garantiza.

YAMA / 641-4186 AWE MES!

Parlamentario Eduard Pieters di PPA:

Aruba mester representacion na Hulanda y transparencia riba e asunto di Arubahuis

**Gobierno no por keda den silencio*

ORANJESTAD (AAN): Durante e rueda di prensa semanal di fraccion di PPA, parlamentario Eduard Pieters a pone dos preocupacion grave riba mesa cu no por ignora mas: Aruba ainda no tin un minister plenipotenciario en Hulanda y siman pasa a suspende e directora di Arubahuis, sra. Croes, sin spli-cacion publico suficiente. Ta dos tema di hopi peso cu ta toca directamente e posicion di Aruba den Reino Hulandes y especificamente e manera con gobierno ta maneha proceso y nos propio profesionalnan.

Un suspension sin claridad
E suspension repentino di e directora di Arubahuis a sorprende fraccion di PPA. Sin drenta den contenido di e caso, cu incluso ta den investigacion, ta preocupante e forma cu gobierno y e minister en cuestion a actua. “No a presenta informacion concreto na Parlamento, no tin claridad publico y segun informacion disponibel, no a sigui e principio basico di ‘hoor en weder-hoor’”, Eduard a elabora. Esaki ta crea un precedente peligroso. Segun Pieters:



“Nos ta papia di un profesional cu a ocupa funcionnan clave pa pais Aruba, no di un nombracion reciente. Suspende un funcionario den silencio, cu restriccio total di acceso y autoridad, sin un proceso cla, ta tanta hopi pregunta serio riba trato di nos propio profesionalnan y respet pa debido proceso”. Mas ainda, e silencio hermetico cu a sigui no ta aceptabel. Transparencia no ta un luho; ta un rekesito di bon gobernacion, specialmente ora Aruba no tin liderazgo cla na su representacion den exterior. **Minister Plenipotenciario: no ta un deseo, sino un obligacion** “Tin hende ta puntra pakico PPA ta insisti riba nombracion di un Minister Plenipo-

tenciario. E contesta ta simpel: no ta un deseo di PPA; ta un obligacion constitucional. Statuto di Reino Hulandes (art. 7-10) ta regla cu cada pais autonomo, Aruba, Corsou y Sint Maarten den Reino Hulandes, mester tin un Minister Plenipotenciario pa participa den Rijksminister-raad, inclusivo cu derecho di voto,” Eduard a vocifera.

Den practica, e ausencia aki ta costa Aruba influencia, informacion y bos den e decisionnan di sumo importancia. Den diplomacia, presencia fisico y representacion digno no ta opcional. Aruba mester ta representa na Den Haag, pa defende su interes y contribui activamente na e decisionnan di Reino.

Arubahuis sin direccion y un pais autonomo sin bos Segun Pieters, actualmente, Aruba no tin ni un Minister Plenipotenciario ni un director activo di Arubahuis, un institucion clave pa coordinacion, diplomacia y representacion. Esaki ta un bashi institucional cu no por sigui mas. Ademá, cu un caso legal inminente, e pregunta ta legitimo: ken lo asumi e costonan? Lamentablemente, ta

e ciudadano via belasting. Finalmente PPA no ta pidiendo favoritismo ni proteccion politico. “Nos ta pidiendo claridad, proceso corecto y liderazgo. E investigacion mester sigui su curso, pero gobierno mester duna informacion y asumi responsabilidad. Despues di casi un aña,

ta ora pa nombra un minister plenipotenciario y restaura direccion na Arubahuis. Orguyo di partido y ego personal mester keda un banda. Aruba ta un solo pais, un solo bandera y merece representacion fuerte, transparente y digno,” Eduard Pieters a finalisa bisando.

Pa sigui stimula talento local: ELMAR ta sostene e Rookies na Soca Monarch



ORANJESTAD (AAN): Pa prome biaha, ELMAR ta orguyosamente participa como sponsor oficial di Aruba Soca Monarch cu un enfoque special riba e proximo generacion di artista: e rookies.

Aruba Soca Monarch ta celebra creatividad y expresion musical local, y ta un evento di gran importancia pa Aruba. Como un compania local, ELMAR ta reconoce e bator cultural y ta sigui compromete pa apoya iniciativanan cu ta fortalece comunidad na Aruba.

Como parti di e sponsorship, ELMAR ta presenta e Soca Monarch Rookie of the Year Award, un premio dedica pa reconoce y stimula talento nobo cu ta musta potencial y pasion pa musica soca. Cu e premio aki, ELMAR ta duna rookies no solamente reconocimiento, pero tambe motivacion pa sigui desaroya nan talento y futuro musical.


ELMAR kier expresa su gradicimento na Stichting Musica pa e oportunidad y colaboracion. Stichting Musica ta hunga un rol esencial den promocion y preservacion di nos musica local.

ELMAR ta desea tur rookies hopi exito cu e proximo competencia di Aruba Soca Monarch, y ta spera cu e evento lo sigui crece como un pilar cultural cu ta eleva musica y talento Arubano.

STERILISA BO MASCOTA

GRATIS!

WhatsApp +297 593 8390



YUDA NOS CONTROLA E SOBREPULACION AWE

AWAA



AANKONDIGING

Bij exploit van mij, Josefijn P. Locadia, deurwaarder voor burgerlijke zaken bij het Gemeenschappelijk Hof van Justitie van Aruba, Curaçao, Sint Maarten, Bonaire, Sint Eustatius en Saba, en bij het Gerecht in Eerste Aanleg van Aruba, van 29 januari 2026 waarvan een afschrift is gelaten aan de Directeur van het DWJZ in Aruba, die het origineel hiervan voor GEZIEN heeft getekend, zijn **Sandra Sohaira CARRION, Ferdinand Johan CARRION en Tucia FLORENCIO** allen zonder bekende woon- en/of verblijfplaats in Nederland en de Verenigde Staten van Amerika of elders,

OPGEROEPEN.

Om op **woensdag, 13 mei 2026 des voormiddag om 09.00 uur** ter terechtzitting van het Gerecht in Eerste Aanleg van Aruba in het gerechtsgebouw aan de J.G. Emanstraat no. 51 te Oranjestad, Aruba te verschijnen, teneinde op het door **Anthony Roberto CARRION**, ingediend verzoek te worden gehoord, welke domicilie kiezende ten kantore van advocaat mr. Richi Jairo Kock,

Josefijn P. Locadia,
Gerechtsdeurwaarder.
588-1700

Minister di Hubentud, mr. Gerlien Croes ta anuncia:

Misha Raymond nombra como Coordinador Nacional di maneho di Hoben

ORANJESTAD (AAN): For di 1 di februari binidero, Aruba lo tin su prome Coordinador Nacional di maneho di Hoben (Nationale Coördinator Jeugd-beleid). E nombramento aki ta marca un logro importante den e fortalecimiento continuo di e maneho di hoben pa futuro y e colaboracion cu partnernan den e sector.

Ministerio di Relacionnan den Reino, Educacion, Hubentud, Innovacion y Deporte ta anuncia cu Raymicheline 'Misha' Raymond ta wordo nombra oficialmente como Coordinador Nacional di

maneho di Hoben desde 1 di februari binidero.

Den e rol aki, Misha Raymond lo traha di serca cu organisacionnan, instancianan y partnernan den sector cu tin di haber cu entre otro e cuido, desaroyo y seguridad di hoben. Cu enfoque riba fortalece colaboracion, sostiene y desaroya iniciativanan pa hoben y conecta e maneho di hoben cu practica. E lo funciona como punto di contacto pa e sector y contribui na e desaroyo continuo di e maneho di hoben pa futuro di Aruba. Misha Raymond ta un psicologo GZ cu mas di 10 aña di experiencia cu



un specialisacion particular den salud mental di mucha y hoben. Ademas, e tin experiencia administrativo como ex-miembro di Parlamento di Aruba. Cu su combinacion di su exper-

ticio profesional, experiencia como Parlamentario y conocimiento di e veld, e ta trece experiencia balioso. E Coordinador Nacional di maneho di Hoben lo concentra riba alinea miho e

iniciativanan, proyectonan y actividadnan pa hoben, fortalece comunicacion entre partnernan y sostiene accionnan comun, cu e meta pa crea un enfoque mas fuerte y mas coherente pa e bienestar di hoben na Aruba.

Minister Gerlien Croes ta expresa su confiansa den Misha Raymond y ta mira cu entusiasmo pa un colaboracion constructivo cu e sector di hoben. Hunto nos ta traha pa construi un futuro caminda cada hoben na Aruba ta wordo mira, scucha y sosteni.

Ta check si acaso ta Hit & Run...

Homber haya benta abao den Venezuelastraat cu posibel golpi fuerte na cabez




ORANJESTAD (AAN): Diahuebs anochi den careda di 10' or, polis a bay direccion Venezuelastraat, unda e prome informe a drenta cu e detaye cu auto a dal un persona.

Polis cu a yega a bin haya un persona masculino den uniform di Security drumi abao riba caminda. Banda pazuid di caminda tin un bicicleta.

Autoridad a tende di diferente persona, kendenan a bisa cu a bin hay'e abao riba caminda y nan ta pensa cu auto a dal'e y sigui core. Polis a haci e persona drumi abao diferente pregunta, pero e tabata basta turdi ainda y no por a corda nada.

A manda pidi presencia



di Ambulance, y tambe a yama Polis di Trafico pa puzzle loke exactamente a socede. A cuminza pensa cu kizas e mes tambe a dal contra un auto staciona, y despues a cay duro riba caminda.

Ora cu Ambulance a yega, e Paramediconan a presta asistencia, y e persona keto bay tabata

basta turdi y confundi cu loke a socede. E por ta efecto di golpi fuerte na cabez.

A dicidi na bay cu ne pa Servicio di Emergencia na Hospital, unda lo por check pa golpi interno den su cabez, y otro parti di curpa pa purba decifra loke a socede cu ne den Venezuelastraat.



PERDI



Nos cachu cu ta yama Boembie a perde dilanti Noord Super Market/ Saliña Serca.... esan cu por sa algo please yama 660-3848 e tin su chip.

Aruba ta drenta oficialmente un etapa nobo pa educacion profesional

Minister Gerlien Croes a firma un acuerdo di colaboracion cu ROC Mondriaan Hulanda

ORANJESTAD (AAN): Aruba ta drenta oficialmente un etapa nobo pa educacion profesional (Beroepsonderwijs). Awemainta, Minister di Educacion, mr. Gerlien Croes, a firma un acuerdo di colaboracion cu ROC Mondriaan di Hulanda. E firma aki ta marca un paso importante den e fortalecimiento continuo di educacion profesional y educacion practico continuo na Aruba.

Den e acuerdo aki, Colegio EPI, Stichting Educacion

Profesional Basico (SEP/EPB) y OABA ta wordo reconoci oficialmente como partnernan di colaboracion. Tur e institucionan ta comparti un pasion pa educacion di calidad y atractivo, y e colaboracion aki ta conecta Aruba y Hulanda riba un fundeshi solido di intercambio di conocimiento, experiencia y innovacion.

Colegio EPI ta funciona como un instituto di formacion pa educacion profesional medio (MBO) na Aruba, cu cuatro



y fortalecimiento di Leven Lang Ontwikkelen (LLO) Intercambio y bishitanan di trabou entre docentenan y studiantenan

Sosten pa posibel aplicacion pa Regionaal Investeringsfonds (RIF)

Temanan actual den educacion manera AI, desaroyo di team y igualdad di oportunidad

E acuerdo ta stipula e principianan general di colaboracion, cu acuerdo specifico pa diferente scolnan y gruponan escolar lo detaya e areglonan concreto.

E acuerdo ta drenta na vigor desde 1 di januari 2026 y lo ta valido te cu 1 di januari 2030, cu e intencion pa sigui desaroya y fortalece e colaboracion, y cu e deseo, pa prolonga of renoba e acuerdo.

Cu e firmamento di e acuerdo aki, Gobierno di Aruba y su partnernan educativo ta confirma nan compromiso pa sigui inverti den educacion fuerte, moderno y conecta cu practica, cu e obhetivo final pa crea mas y miho oportunidadnan pa tur alumno y estudiante na Aruba.

Delegacion UNOPS di Nacionnan Uni na Aruba pa check con ta construi un prison nobo



ORANJESTAD (AAN): Husticia ta mas cu solamente seguridad: E ta trata di siguransa, dignidad y solucionnan di largo plazo pa nos comunidad.

Diahuebs Minister di Husticia, Integracion, Transporte Publico y Energia mr. drs. Arthur Dowers, a ricibi un delegacion di United Nations Office for Project Services (UNOPS) pa explora e posibilidadnan pa desaroya un centro coreccional nobo na Aruba.

Tabata durante e bishita di Minister Dowers na Sint Maarten en conexion cu e Justitieel Vierlandenoverleg, cu e mandatario di Husticia a reuni cu ehecutivonan di UNOPS, anticipando nan bishita y presentacion na Aruba.

E presentacion a enfoca riba factibilidad, riesgonan potencial, calculacion preliminar di costo y e pasonan necesario pa sigui di un manera responsable.

UNOPS ta duna asistencia tecnico pero tambe supervision financiero pa cu proyectonan publico tur rond mundo. Durante e reunion, UNOPS a comparti informacion inicial basa riba standardnan internacional, construccion sostenibel y planificacion di largo plazo.

UNOPS ta traha na nivel global cu gobierno pa entrega proyectonan di infraestructura compleho cu transparencia y eficiencia.

E reunion aki ta marca un paso importante den explora cuidadosamente solucionnan cu ta fortifica e sistema di husticia di Aruba, manteniendo siguransa, humanidad y sostenibilidad como punto central.

units y 19 programanan di estudio, reparti entre BOL y BBL nivel 3 y 4, ademas di training y formacion den marco di Leven Lang Ontwikkelen (LLO). SEP/EPB ta enfoca riba educacion secundario y MBO nivel 2, mientras cu OABA ta ofrece educacion pa adulto y enseñansa MBO nivel 1 te cu 4, tambe ta inclui training y formacion continuo (LLO).

ROC Mondriaan, cu ta ofrece alrededor di 240 programanan di MBO reparti entre nan 24 scolnan na Hulanda,

y cu amplio experiencia den educacion pa adulto, ta traha hunto cu e partnernan na Aruba pa brinda e miho educacion posibel na nan alumno y studiantenan. A traves di colaboracion di contenido y organisativo, e partnernan ta siña di otro y ta fortalece nan sistema educativo.

Pa e proximo añanan, e colaboracion ta concentra riba:

Revision y progreso di e estructura di cualificacion, incluyendo examinacion y cuida di calidad

Flexibilisacion di educacion

Seraida Pemberton Leonard:

Meta di proyecto piloto di banchi di enkel ta pa guia detenidonan pa no haya nan involucra mas cu husticia



ORANJESTAD (AAN): Personal di Reclassering, e siman aki a haya training pa uza e aplicacion/software di e programa di monitoreo electronico di Smart Justice "Buddi". Director di Stichting Reclassering, señora Seraida Pemberton Leonard a remarca cu e proyecto aki ta acapara henter e sistema hudicial, entre otro Ministerio Publico, Corte di Prome Instancia, KPA, y Departamento di CEA.

Pa loke ta trata e banchinan di enkel, señora Pemberton Leonard a duna di conoce, lo keda introduci den diferente fase. Ministerio publico lo dicidi ken lo cay den e prome grupo y lo haci peticion na hues comisario pa schors e




detenido cu e condicion cu e lo uza e banchi. CEA ta pone y kita e banchi y den caso di violacion di condicionnan, e lo tuma accion hunto cu Reclassering. Reclassering ta monitoria e persona cu e banchi, hunto cu e compania Buddi. Y Reclassering ta duna guia tambe na e persona.

E proceso di esaki no ta pa pone hende riba lista pa haya banchi, sino e ta bay segun e procedura penal cu ta dicidi ken ta bin na remarca pa haya banchi y ta enfoca riba menor nan di edad, 12 – 23 aña. "No ta tur hende ta bin na remarca aworaki pa haya banchi. Esaki ta proyecto piloto na unda cu lo evalua na unda mester haci

cambio y mehora pa despues amplia esaki mas, señora Pemberton Leonard a remarca.

E momento cu e detenido bin na remarca pa haya un banchi, e ta wordo poni bou di guia di Reclassering y tur si man e mester presenta pa haya su schema cu ta indica kico mag di haci, unda mag di bay y unda no. E banchi ta controla e movicion di e persona y e no ta liber pa bay unda cu e kier. "Mas importante, e ta haya e guia necesario pa cambia su comportacion y mentalidad. E meta final ta pa e personanan ki no haya nan mas den problema cu husticia", señora Pemberton Leonard a enfatisa.

Tabata despues di 4'or di atardi y ya caba chauffeur tabata burachi



ORANJESTAD (AAN): Diahuebs atardi algo pasa di 4:30'or, un unidad di Polis a ser manda riba caminda di Papaya, unda cu un auto a drenta mondi.

Ora cu e patruya a yega, nan a bin mira cu un auto a drenta den pida mondi. E chauffeur a sali ileso, y autoridad a cuminsa papia cu ne. Durante e combersacionnan, Polis a ripara cu e persona tin característica di un hende cu ta bao influencia. Esey ta bin debi cu su wowo ta basta cora, e no por para keto y stret, y ta papia cu lenga basta pisa. Pues Polis a sospecha cu e lo a bebe un tiki di mas.

Nan a pidi su cooperacion pa haci test di supla pa check alcohol den su curpa. Asina a uza e aparato di Alco-Sensor y manera agentenan a sospecha, el a sobrepasa e limite di $\mu\text{g/l}$ legal di alcohol. Mesora nan a informe cu e ta wordo deteni pasobra ta coriendo auto bao influencia y haye involvi den accident.

Analizando e lugar di accident, ta cla cu e auto tabata yegando cu velocidad halto for di pariba, y ta pasa no mucho leu di un cura di cas drentando full den e mondi cu di baina bo por a mir'e.

Polis di Trafico a wordo pidi pa yega na e lugar, y a nota cu team di Forensys tambe a bin traha rapport.



Barionan ta uni forza pa e Bon Comun na Aruba



Departamento di Cultura Aruba ta invita hobennan pa participa den sesion creativo 'Arte di Palabra Aruba 2026'

ORANJESTAD (AAN): Departamento di Cultura Aruba (DCA) ta invita tur hoben interesa den expresion oral y creacion artistico cu palabra pa participa den un sesion creativo di Arte di Palabra Aruba 2026. E invitacion ta pa hobennan di 12 aña pa 21 aña di tur scol secundario di MAVO, HAVO, VWO y EPI klas 1 y 2.

E sesion creativo ta un espacio di inspiracion, skirbimento y intercambio creativo, caminda participantenan lo traha cu palabra, ideanan y expresion personal como preparacion pa e evento final.

Informacion di Sesion Creativo:

Fecha: 19 y 28 di februari 2026

Orario: 3:00 pm – 5:00 pm

Luga: Departamento di Cultura Aruba (DCA), John F. Kennedy Education Center

Durante e sesionnan aki, participantenan ta wordo anima pa skirbi, pensa y comparti nan palabra den nan mes voz creativo. E sesion creativo tin un maximo di 15 puesto disponibel, pa asina garantisar atencion y guia personal. Participantenan mester trece: pen/potlood y papel pa skirbi riba dje y boter pa por yena awa. Registro ta obligatorio y por wordo haci via e formulario online y/o QR code indica.

Departamento di Cultura Aruba ta anima tur hende cu interes den palabra y expresion artistico pa probecha di e oportunidad aki y bira parti di Arte di Palabra Aruba 2026.

ORANJESTAD (AAN): Durante e parti final di e sesion di mainta di e Common Good Conference, representantenan di Mabon, Dakota, Bushiri, Bernhardstraat y Village a firma oficialmente un acuerdo di cooperacion cu un meta cla: mehora cada bario y, paso pa paso, expande

esaki pa mas barionan tur rond di Aruba. E momento a resalta e espiritu di unidad y compromiso cu e conferencia ta representa. Empatía, yuda otro, wak pa bisiñanan, check si tur cos ta bon, y duna otro un man ta balornan esencial cu ta forma parti di e bon comun. E acuerdo aki ta

muera con cambio positivo ta cuminsa den bario, unda hende ta cuida pa otro y ta traha hunto. Cu e accion aki, e movimiento di e bon comun ta sigui haya forma, conecta barionan y pone un base firme pa un Aruba mas fuerte, mas humano y mas uni.

Vocero Maikel Gomes:

Prome cu carnaval BCI lo parti saco den tur parada di carnaval

ORANJESTAD (AAN) Den entrevista cu Matutino DIARIO, señor Maikel Gomes, vocero di City Inspector a duna di conoce cu Departamento di Infraestructura y Planificacion, DIP, a saca e Kavelnan caba y e personanan concerni sa ken ta haya cual lugar.

“Loke ta Kavel no ta cay bao di nos tampoco, esey ta DIP. Esey ta otro tarea mas cu ta cay bao di Ley di DIP.

Pa loke ta tempo di carnaval, nos di City Inspector ta bay parti saco prome cu e paradanan di Playa, e chikito y e grandi, di San Nicolas tambe y Lighting Parade”, el a splica y a reitera cu loke ta e parti di kavel no ta cay bao di BCI.

City Inspector lo sigui haci control y tanten cu ta durante carnaval y ta kita loke ta ilegal tambe.

“Mi ta bolbe haci un yamada na pueblo, como vocero di Bureau City Inspector y den nomber di Minister di Asuntunan General, pa tur esnan cu ta den carnaval mantene esaki limpi, y lag’e limpi manera bo hay’e. Y durante e tempo aki



cu ainda carnaval no a cuminsa, pa no pone sushi ni cera e kavelnan cu no ta pertenece na bo persona. No pone cabuya, ni nada otro, pasobra nos ta kit’e bek”, Maikel Gomes a señalá. El a agrega cu di parti di BCI nan ta bay parti mas saco e aña aki, y el a haci un peticion na ATA tambe, y berdad nos a haya donacion di basta caha di saco, y esaki lo wordo reparti tambe. “Mi ta kere nos ta bay parti extra saco tambe, pues, un yamada tambe di danki pa ATA di nos banda, pa e donacion. Y nos ta pidi pueblo pa enjoy carnaval, pero tene e ruta limpi. Si boso



hay’e limpi, lag’e limpi atras. P’esey nos ta parti saco”, Maikel Gomes a indica.

El a agrega cu saco lo wordo duna na tur hende, tanto esnan cu tin tent como esnan para na banda. Y tanten cu tin den stock nan ta duna mas na esnan cu ta pidi esey.

Rodney Solognier, President di SPA cu yamada pa pueblo:

‘No tene miedo, no pensa malo, no huzga ya cu Polis ta bo amigo y tey pa yuda’



ORANJESTAD (AAN) -- Presidente di Sindicato di Polis, SPA, señor Rodney Solognier, kier a haci un yamada na comunidad, pa no tene miedo, no pensa malo, no haci di huez pa huzga.

“Tur cos ta cana manera mester ta, nos ta bolbe duna condolencia na e famia, pasobra e situacion cu a sosode Diamars atardi na Pos Abao ta lamentable, tanto pa e famia como pa nos di KPA tambe, pero nos tey semper pa sirbi pueblo. “Pero si mañan ta resulta, na un manera di

bisa, cu e dos cabayeronan polis ta fout, tur hende lo haya nan dia, tur hende lo haya nan castigo. E ta simplemente, tempo lo dicta y lo wak kico ta kico. E ta aworaki fuera di nos alcance di sindicato, di Cuerpo Policial, y e ta den man di Landsrecherche, nan ta haci nan trabao, despues lo bay Corte y tin un huez cu lo dicta kico ta kico.

“Mi ta pidi comprension cu esey, nos sa cu ta fastioso, mi no kier ta na e famia su luga, pero aworaki nos tin cu biba cu e realidad cu e procesonan tin cu sigui, y nos tin djis cu wak kico lo pasa. Pero no pa bay trece miedo den comunidad, cu polis t’esaki cu polis t’esaya. Polis ta bo amigo, polis ta purba di yuda, polis kier trece armonia den nos tur”, Rodney Solognier, Presidente di SPA, a conclui.

Su so ta biba den cas

Pa oranan largo un señora tabata benta abao na suela



ORANJESTAD (AAN): Diaranson anochi un rescate chikito a sosode na un adres na Sero Blanco. Informacion a drenta cu den e cas tin un persona riba vloer.

Segun informacion, for di merdia un señora di edad a cay y a keda riba vloer. No tin ningun hende eyan mas pa tende su grito, pues no por a yude. Aunke awendia bo por cumpra aparatonan cu ta funciona como un remote chikito cu ta colga como ‘hanger’ rond di bo garganta, y den caso di urgencia ta djis pidi boton, y aparato

ta yama sea servicio di emergencia of bo famianan.

Te anochi a bin haya sa di e caso, y mesora un unidad di Polis a ser mandada na e cas. E prome patrulla di Polis cu a yega, mesora a purba drenta pa yuda pero cas ta na lock. Pues toch despues mester a pidi Brandweer.

Brandweer a haci su parti, y na final por a mira Paramediconan a sali cu un señora di edad cu un cara tristo y a bay rumbo Hospitaal cu ne pa chekeo. No ta conoci ta cuanto ora e señora a keda abao na suela.

President Rodney Solognier di Sindicato SPA:

E dos polisnan involvi den e caso di Pos Abao ta den man di Psikiatra

ORANJESTAD (AAN)-- Pa conclui su encuentro cu medionan di comunicacion, Diamars cu a pasa, señor Rodney Solognier, Presidente di Sindicato di Polis (SPA), a expresa cu SPA a bin dilanti pa enfrente prensa, pasobra loke a sosode aña pasa cu e hoben Aiden Lanoy (unda tin dos polis involvi tambe), ta completamente otro, cu loke a sosode Diamars na Pos Abao.

“Locual a pasa aña pasa cu e persona Lanoy, ta completamente distinto na loke a pasa Diamars. Tur cos ta diferente”, el a re-



itera.

Solognier a enfatiza cu polis kier ta “bo amigo” y manera den autonan di polis ta skirbi seguridad nan ta trece, nan no kier trece problemanan entre nan y comunidad. “Manera hopi biaha nan ta bisa, nos ta

un pais. Legalmente, nos un pais, pero ilegalmente si bo mira bon nos ta un ‘kleine dorpje’, nos tur ta dal den otro, nos tur sa ken ta otro, y mi ta kere cu lo mas bunita ta pa nos tur biba bon hunto cu otro, pero e circunstanci-

anan cu ta pasa, ta pa via di otro departamentonan cu no ta funciona manera mester ta, anto polis ta haya e problema riba dje”, Rodney Solognier a argumenta.

El a exclama cu polis tey pa yuda pueblo, pero pa tur cos nan ta yama polis, siendo cu tur hende ta, y tin, trabao pa haci “on the

side” pa cu polis tambe.

Solognier, contestando un pregunta di prensa, a indica cu e dos cabayeronan polis ta den man di cierto psiquiatra, pa haya atencion pa locual a pasa. “No tur hende tin mente mes fuerte cu otro”, segun Rodney Solognier a expresa.

Yvonne Bermudez di Comision Vision Pedagogico:

Esaki ta e di tres aña cu nan campaña di concientizacion den carnaval

•No hiba mucha di 0-5 aña na carnaval

ORANJESTAD (AAN) Señora Yvonne Bermudez, di Comision Vision Pedagogico Aruba, cual ta consisti di diferente instancia, manera Departamento di Asunto Social, Fundacion Respetami, Wit Gele Kruis, Fundacion Pa Nos Muchanan, y Tienda di Educacion, den entrevista cu Matutino DIARIO a bisa cu esaki ta e di tres aña cu nan tin e campaña di concientizacion, pa tene nos muchanan safe den e periodo di carnaval, y cu nan ta sumamente contento cu e reaccionnan cu nan ta ricibi.

“Nos ta realiza cu trahando na concientiza, no ta un proceso cu ta bay lihe, pero cu ta tuma su tempo. Nos tin cu comparti e informacion y keda consistente pa e comunidad reflexiona riba e puntonan cu nan ta trece padilanti”, Bermudez a señala.

El a expresa cu ainda tin e mensahe cu ta parce cu nan tin algo contra carnaval, pero si nan concientiza riba muchanan di 0-5 aña, cu ta nan mensahe principal, pa no hiba nan carnaval, nan ta haci cu e carnaval ta bay desaparece.

“Nos ta conciente, y mirando datonan di otro paisnan, cu esaki no ta bay ta e caso. Despues di edad di cinco aña nos por cuminsa hiba e muchanan carnaval, y esaki, si ta den e mucha, si ta den e mayornan, y den parti di nos cultura, esaki lo no afecta ningun carnaval di mucha ni carnaval di hende grandi”, Yvonne Ber-



mudez a señala.

E Comision ta contento cu hopi mayor a contribui cu e encuestanan cu a wordo realiza aña pasa, basta conciente cu nan ta propagando e punto cu no ta sano.

“Mayornan cu lo ta desea pa hiba e muchanan carnaval, laga nan experiencia con e ta, pero keto bay nos ta keda scucha y wak cu e sonido cu ta wordo poni den carnaval no ta e sonido corecto; nos ta wak e ruta cu ta demasiado largo. Nos ta conciente cu muchanan por disfruta di carnaval, pero nan por disfruta di esaki na un manera mas sano”, Yvonne Bermudez a indica.

El a sigui splica cu e grupo meta aki, di 0-5 aña di edad, varios di nan ta bayendo crèche, Varios crèche ta organiza un parada chikito na horarionan cu ta mas adecuada pa muchanan chikito, e por ta un lugar paden, unda nan ta celebra cu musica, baliamento, y experiencia e sensacion di carnaval sin ta durante un parada largo den rutan cu ta pa hende grandi”, Bermudez a señala.

Minister Gerlien Croes ta desea éxito na studiantenan di Colegio EPI cu a sali rumbo pa Europa

ORANJESTAD (AAN): Minister di Educacion, mr. Gerlien Croes, ta expresa su orguyo y ta desea tur clase di éxito na studiantenan di Colegio EPI cu a sali rumbo pa Europa pa participa den un intercambio educacional y pasantia internacional danki na e programa Erasmus+ (Plus). E oportunidad aki ta representa un paso importante den e desaroyo academico y personal di nos hobennan.

Den e ultimo periodo, un total di 34 estudiante di Colegio EPI a sali pa exterior pa haci nan pasantia den paisnan manera Irlanda, Belgica y Spaña, entre otro. Tur e studiantenan cu ta participa den e proyecto aki ta estudiante cu ta cerca di gradua y cu ya tin experiencia den nan ramo di estudio.

Minister Gerlien Croes ta subraya cu e participacion den Erasmus+ ta contribui directamente na e crecimiento internacional di nos studiantenan y ta permiti nan pa amplia nan conocimiento, habilidadnan y vision riba mercado laboral. E ta enfatisa cu e experiencia cu nan ta gana den exterior lo wordo treci bek Aruba, na beneficio di nos comunidad y desaroyo di nos isla.



Colegio EPI ta un institucion oficialmente acredita pa Erasmus+, cual a permiti cu e aña aki estudiante di tur cuater unit di EPI por participa den e programa. E meta pa e proximo añanan ta pa sigui amplia e alcance di e intercambio educacional, cu un obhetivo di manda mas estudiante pa Europa y fortalece e posicion di educacion profesional na Aruba.

Ademas di Erasmus+, tambe tin colaboracionnan cu partnernan den sector priva y hotelero, manera Iberostar, cu ta brinda oportunidadnan adicional pa pasantia tanto den e Caribe como na Europa. Esaki ta demonstra e balor di

colaboracion publico-privada pa crea oportunidadnan concreto pa nos hobennan.

Minister Gerlien Croes ta expresa su gratitud na tur e partnernan cu ta contribui na realizacion di e pasantianan internacional, y ta reconoce e papel fundamental di e mayornan cu ta sostene y motiva nan yunan durante e trayecto aki.

Gobierno di Aruba ta sigui compromete su mes pa fortalece educacion, internacionalisacion y oportunidadnan pa desaroyo, pa asina prepara nos hobennan miho pa futuro y pa e demanda di un mundo cada biaha mas global.

Tradición
ta conecta nos

SETAR
Sponsor Oficial

Mira monton di hende a bay busca nan T-shirt di apoyo pa Lord Lally cu su The Lizard Kacking

ORANJESTAD (AAN): Manera cu DIARIO a publica den su edicion di Diabierna, con rapidamente stock di T-shirt di Lord Lally a caba riba Diahuebs, a splica cu Diabierna mainta lo tin stock di 200 mas.

Djis mira e potret aki. Mainta trempa tabatin rij di hende wardando pa asina a haya T-shirt pa apoya Lord Lally cu su 'The Lizard Kacking'. E rij largo di hende ta berdadero prueba cu e movimiento di Lord Lally a crea interes hamas antes bisto bek pa e evento di Aruba Soca Monarch. Y e sosten pa su cancion ta



sigui di ta bira fuerte.

A haya sa cu tin hopi extra hende cu ta rumbo pa bay mira e evento awe Diasabra anochi na Aruba Carnival & Entertainment Center. Pero tambe tin indicacion cu tin hopi hende extra cu a manda

busca e servicio di Pay-per-View pa asina nan por mir'e na TV en vivo. Esnan cu awe ainda kier busca Pay-per-View via TV, djis manda un mensahe simple na WhatsApp di 525-1002 y contesta e mensahenan cu lo drenta despues. Si bo kier mire via bo computer, tablet, etc., esey bo tin di bay na website di ppv.setar-code.aw pa bo haya sa e proceso.

E T-shirtnan di Diabierna mainta a caba rapidamente.



E ora a core manda busca 200 extra (e ultimonan) pa den oranan di atardi por a ofrece na publico.

ARUBA Programa Carnaval 72

Diasabra 31 Januari 2026 - Bubali/Noord ~ 3:00 pm
Parada di Mucha na Noord

Diasabra 31 Januari 2026 - Carnival Village ~ 7:00 pm
Aruba Soca Monarch Grand Final

Diadomingo 1 Februari 2026 - Oranjestad ~ 2:00 pm
Parada Grandi di Mucha na Oranjestad

Diaranson 4 Februari 2026 - Bubali-Noord ~ 7:00 pm
North International Sunset Parade

Diabierna 6 Februari 2026 - Oranjestad ~ 10:00 am
Parada Escolar Oranjestad (Scolnan Secundario y Avanza)

Diabierna 6 Februari 2026 - San Nicolas ~ 10:00 am
Parada Escolar San Nicolas (Scolnan Secundario)

Diabierna 6 Februari 2026 - Savaneta ~ 8:00 pm
Parada di Mascarada Savaneta

Diabierna 6 Februari 2026 - Convention Center ~ 9:00 pm
Kiwanis Club of Palm Beach Masquerade Party

Diasabra 7 Februari 2026 - San Nicolas ~ 3:00 am
Jouvert Morning Pajamas Parade

Diadomingo 8 Februari 2026 - San Nicolas ~ 1:00 pm
San Nicolas Grand Children Parade

Diadomingo 8 Februari 2026 - Carnival Village ~ 6:00 pm
Kimamento di Momito

Diahuebs 12 Februari 2026 - San Nicolas ~ 8:00 pm
Parada di Luz San Nicolas

Diasabra 14 Februari 2026 - San Nicolas ~ 12:00 pm
Parada Grandi di San Nicolas

Diadomingo 15 Februari 2026 - Oranjestad ~ 11:00 am
Parada Grandi Carnaval 72 Oranjestad

Diadomingo 15 Februari 2026 - Harbour Arena ~ 7:00 pm
Kimamento di Rey Momo

Magic FM cu su team experto cla pa transmiti Aruba Soca Monarch 2026



ORANJESTAD (AAN): Magic FM ta orguyoso di anuncia su ekipo oficial di comentarista pa e transmission en bibo di Soca Monarch Contest 2026, cu lo tuma lugar awe Diasabra, directo for di Aruba Carnival & Entertainment Village, den curason di San Nicolas.

Pa e gran final di e prestigioso competencia musical aki, Magic FM a reuni un line-up di expertonan cu conocimiento profundo y amor pa e genero di soca. Entre nan tin dos veterano di musica y personalidad local di radio, Ivan Kelie Jr. y Rene Koolman, conoci pa nan experiencia amplio y nan aporte constante na escena musical di Aruba.

E ekipo di transmission ta completa pa Magic FM su directora Erin Croes, productor tecnico Trevor Rosel, y content creator Allen Rafael; sin laga afo e conocido Mickey Gravenhorst como nan F&B coordinator.

Hunto, nan ta forma un ekipo dinamico y bon prepara pa trece tur detaye, analisis, atmosfera y emocion di e Soca Monarch Contest 2026 pa publico. Magic FM ta comprometi pa ofrece un cobertura completo y profesional, cu comentario experto, informacion di backstage y reaccion en bibo, pa sigura cu oyentenan no perde ningun momento di e gran final.

Tremendo parada escolar di muchanan di scolnan basico

ORANJESTAD (AAN) E parada di carnaval di scolnan basico a start na ora Diabierna mainta na Playa.

E tabata simplemente tremendo, masha bunita mes, y el a atrae hopi mirones na caminda. Nan a wordo acompaña e bandanan musical Groove Masters, Youth Xtreme, ademas di un Disco.

Riba combinacion di potret por aprecia con e muchanan, yena cu alegria, a goza di nan parada escolar di carnaval, hunto cu nan maestronan. Sin duda, carnaval ta den nos muchanan for di chikito caba.



The St. Regis Aruba Resort ta marca su prome aña di operacion

**Enfocando riba comunidad, personal y crecimiento sostenibel*



ORANJESTAD (AAN): The St. Regis Aruba Resort a celebra recientemente su prome aña di operacion, reflehando riba un logro marca pa crecimiento solido, participacion significativo cu comunidad y un compromiso constante cu excelencia den servicio.

Pa conmemora e logro notabel aki, e dia a cuminsa cu un desayuno di celebracion pa tur anfitrión—nos empleadonan—un momento di aprecio den cual miembronan di e ekipo ehecutivo a comparti nan gradicimento y reconocimiento pa e dedicacion demostra durante e aña. E celebracion a sigui cu un recepcion special honrando e recepcion di apertura di e resort, y despues cu un encuentro di anochi na e

restaurant insignia di e resort, Eskama Cucina Italiana. Durante e recepcion, e Gerente General di e resort, Sr. Oliver Reschreiter, a expresa su gradicimento sincero na stakeholdernan clave y partnernan di industria, incluyendo entidadnan gubernamental, partnernan di turismo, suplidornan y proveedornan di servicio, cu nan colaboracion y confianza tabata instrumental durante e prome aña di e resort. Sr. Reschreiter tambe a destaca e contribucion di negoshinan local Arubano, cu nan dedicacion y partnership ta sigui eleva e experiencia di huesped. E conexon continuo cu e comunidad Arubano mesun importante. For di su apertura,



The St. Regis Aruba Resort a posiciona su mes no solamente como un destino di luho, sino como un partner di comunidad comprometi y responsabel. A traves di suministro local, partnershipnan, integracion cultural y oportunidadnan di empleo, e resort ta keda comprometi na crece hunto cu Aruba.

Un momento clave tabata e reconocimiento di e anfitriónnan di e resort, cu a reconoce como e curazon di e House of Astor. Durante e ultimo aña, e resort a expande di 223 pa 428 anfitrión, representando 14 nacionalidad diferente. Den 2025, e propiedad a registra 57 transferencia interno y promocion, reflehando su enfoko riba desaroyo profesional y crecimiento di carera riba largo plazo.

Durante e aña, bienestar y participacion di e anfitriónnan tabata ainda mas fortaleci a traves di varios iniciativa, incluyendo un siman di bienestar dedica riba salud fisico, mental y financiero. Actividadnan a inclui sesionnan di yoga, tayer di presupuesto, evento di team-building y competencia amistoso. Durante e periodo aki, e resort tambe a introduci e Legacy Cup, un iniciativa colaborativo entre e dos propiedadnan di luho di Marriott International na isla.

Iniciativanan adicional enfoca riba e anfitriónnan a inclui participacion den eventonan local di coremento y e prome Associate Appreciation Week di e resort, cu actividadnan dedica na reconoce y gradici miembronan di ekipo pa nan dedicacion y contribucion.

Durante e prome 365 dianan di e hotel, outreach comunitario a keda un pilar central di e esfuerzo di e resort a traves di su iniciativa Serve 360. Den e ultimo aña, anfitriónnan a colabora cu organisacionnan local manera Animal Shelter, Club Kibrahacha, Fundacion pa Nos Comunidad y varios otro fundacion riba isla. E es-



fuerzo aki a inclui arma mas cu 75 tas di scol pa muchanan na comienzo di aña escolar, apoya distribuiemento di tas di cuminda durante e temporada di Pasco, y participa den multiple proyecto di haci beach limpi, tanto independiente como hunto cu grupo local.

Mientras The St. Regis Aruba Resort ta wak pa dilanti, e ta reafirma su compromiso cu excelencia den servicio, integridad, desaroyo di Hostnan y impacto comunitario—poniendo e fundeshi pa un futuro fuerte, sostenibel y mutuamente beneficioso pa e marca St. Regis na Aruba.

Ex-Premier Balkenende y Govert Buijs a yega Aruba pa e Common Good Conference

ORANJESTAD (AAN): Diahuebs atardi, Prome Minister mr. Mike Eman a ricibi ex-Prome Minister di Hulanda Jan Peter Balkenende y Govert Buijs na Aeropuerto Internacional Reina Beatrix en conexion cu nan presentacion diabierna den e prome Common Good Conference.

For di aeropuerto, ambos orador, hunto cu Prome Minister Eman a bay directamente pa Renaissance

Convention Center na unda e Expo di Bon Comun tabata tumando luga. Aki tanto Balkenende como Buijs a pasa na varios di e boothnan di e instancianan participante y a haya spli-cacion di e tareanan importante di e instancianan aki.

Cu yegada di e oradornan aki, e lista ta completo pa asina por duna inicio diabierna mainta na e conferencia di E Bon Comun. E

lista di orado ta extenso y ta cubri un area grandi den e movimiento pa cu e Bon Comun.

E conferencia ta conta cu varios orador reconoci internacionalmente manera Michael Sandel, Jan Peter Balkenende, Govert Buijs, Iain McGrilchrist, Francielle Lacle, Thaïs Franken, Robertico Croes y Esther Emerencia-Gomes. E Common Good Conference ta start mañan diabierna pa 9'or di mainta y ta termina 4:30 atardi y ta tuma luga na Renaissance Convention Center.



Columna E Sembrado

Diasabra 31 januari. Di tres siman den tempo ordinario
año 2026 Ciclo A
San Juan Bosco, Sacerdote, tata, maestro y amigo di
hobennan

Calendario Liturgico
Lectura: 2 Samuel 12, 1-7.10-17;
Salmo: 51;
Evangelio: Marco 4, 35-41;

”Calma; keda keto!” (Marco 4,39)

Evangelio di awe ta muestra Hesus como e luz infalibel meymey di e tormentanan scur di bida. Nos bida ta yena cu tormentanan cu nos mester enfrenta tur dia. Tin batayan cu mester wordo bringa. Un problema cu bo mester soluciona y atende cu ne prome cu bo por haci progreso. Meymey di e bringamentonan aki, nos curason tin e tendencia di ta preocupa cu miedo cu nos ta lucha pa cualkier cos pa biba. Meymey di e lucha aki, nos ta yora di miedo. E camindanan aki por pone nos sinti cu nos ta impotente, al fin y al cabo. Den desesperacion nos ta yama na Señor riba su yudansa. Dios no ta manda tormenta den bida, actualmente bibando den mundo material nos ta enfrenta cu problemanan, tormentanan cu ta existi den mundo pa influencia di pica. Pero e bon noticia ta cu Dios ta cu nos tur ora. E problemanan no mester haci nos zwak ma ta fortalece nos confiansa den Esun cu a bisa: “keda trankil. Ami ta cu bo!”. Den cada instancia ora e sacerdote bisa ”Señor sea cu bo” Hesus en realidad ta bisa e tormentanan di nos curason pa ”keda keto awor, keda keto, Mi ta cu boso.”

Oracion: Maria, yuda mi confia den e luz di bo Yiu den tur tormenta. Amen.
Grupo Centro Pastoral



RESULTADO DI SORTEONAN PA CORTESIA DI CADENA ALEXANDER

— Diabierna 30 Januari 2026 —

DIARIO	KORSOU	LUCKY 3	CAT4CHI	ZODIAC
Anochi 8933 1400 0514	Anochi 1914 2233 3647	Merdia 046 X5 Anochi 392 FP	Merdia 5594 2885 9919 FP Anochi 5852 7109 6327 X2	Merdia 9994 Piscis Anochi 4442 Cancer SUPER 4 Anochi 3776
BIG 4 Merdia FP 5408 Anochi X3 3418	OFF Merdia 8841 Anochi 0228	LOTTO DI DIA 03 - 11 - 12 - 15 - 21 Siguijente jackpot: 51.000 Florin		

BUSCA PALABRA

L C I R E Z I L A U Q E
I K E E I E S E A L I M
N C N S S E L E R I W E
S A O C A T U A T O M I
T B H E E X N D L I E L
R D P N K I A Z C D T U
U E D A R A N U M H D M
M E A R A R S I G E E I
E F E I E P X I G O C N
N E H O E E L O R L O A
T R S A R T S T W L R C
K O K N O E N A S R A I
H E M P U D A R F D S O
R B S O I S N G O A I N

Escenario	Speaker	Headphone	Mic
Spotlight	Illuminacion	Instrument	Mixer
Feedback	Equalizer	Wireless	Decora

> SUDOKU <

King Classic Sudoku

6				8	1			
			7	4		2	6	
1	7		3	2	6			8
		8		6				3
	4	7		1	2			
			4		5			
			6	5		4		
	8	6						7
		2		7		3		

Difficulty: ★★★

8/31



Hari Un Tiki

Un homber den Bar a bira pata-pata burachi. Un grupo di persona a mira su condicion, y nan a dicidi pa bay dune un man, y ta bay yuda carg'e pa hibe su cas.

Nan a pone para pa asina check su cartera si e por tin su adres. Pero cada rato e ta sali cay. El a cay ocho biaha ora cu nan tabata cana cu ne bay su auto. Y cada biaha cay basta duro.

Porfin nan a start su auto y core bay na su cas. Ora cu a habri auto pe, y ta yud'e cana pa su porta di cas, el a bolbe cay cuatro biaha prome cu el a drenta den su cura.

Porfin nan a yega na e porta di cas, y nan a bati e bel.

Su casa a yega y habri porta, y a mira e grupo pafu cu su casa.

Un di e hombernan a bisa e ora ey:

— "Nos a dicidi na trece bo casa bek pa su cas."

E casa a mira nan tur, wak rond y a contesta:

— "Esey ta un bunita gesto, y ate burachi aki. Pero unda boso a laga su rolstoel?"

Solucion Anterior

6	9	8	2	3	4	7	5	1
5	4	2	1	7	8	3	6	9
1	7	3	5	9	6	2	4	8
9	5	1	6	4	7	8	2	3
8	2	6	9	5	3	4	1	7
7	3	4	8	1	2	5	9	6
2	1	7	4	8	9	6	3	5
3	6	9	7	2	5	1	8	4
4	8	5	3	6	1	9	7	2

Difficulty: ★★★

8/30



RESULTADO

Diabierna 30 Januari 2026

Sorteo #1840

03 04 09 14

● ● ● **Mega Ball: 15**

- 1^{er} Premio: Tin 0 ganador JACKPOT
2^{do} Premio: Tin 0 ganador di Match 4
3^{er} Premio: Tin 18 ganador di 500 Florin
4^{to} Premio: Tin 187 ganador di 50 Florin
5^{to} Premio: Cu 235 ganador di 15 Florin

Jackpot pa e proximo Sorteo Mini Mega: 3 FEB. 2026
Afl. 675.000,- • MEGA PLUS: Afl. 1.000.000,-

EMERGENCIA NA ARUBA

Weekend 31 Januari y 1 Februari 2026

DOCTER NA WARD

SAN NICOLAS:

Pa San Nicolas, Docter ta na H.A.P. ImSan.
Den weekend di 9:00 am pa 1:00 pm, y di 6:00 pm te cu 10:00 pm.

ORANJESTAD:

Pa Oranjestad, Docter lo ta na Huisartsenpost na Hospital.
Den weekend di 9:00 am pa 1:00 p.m. y di 6:00 p.m. pa 10:00 p.m.

BOTICA NA WARD

Info cortesia: www.iva.aw

PARIBA DI BRUG:

Botica 4 Centro Medico
Bernhardstraat 55
Telefon 584-5794
Telefon: 584-5798

PABAO DI BRUG:

Botica Eagle
Caya Punta Brabo 17
Telefon 587-9011

DENTISTA NA WARD

Weekend 31 Januari y 1 Februari 2026



— 31 Januari + 1 Februari 2026 —

Dr. Adriaan Lacle,
Avenida Milio Croes 116, lokaal 2.
Telefon: 588-2010

ATENCION: Diasabra y Diadomingo, Dentista na warda lo ta merdia na clinica di 12'or pa 1'or. Bo tin di paga 125 Florin pa consulta. Procedimentonan manera ranca djente lo costa extra.



ALMANAC



Bahada y salida di solo na Aruba

—31 Januari 2026
Solo ta baha: 6:41 p.m.
— 1 Februari 2026
Solo ta sali: 7:06 a.m.
Solo ta baha: 6:41 p.m.
— 2 Februari 2026
Solo ta sali: 7:06 a.m.
Solo ta baha: 6:42 p.m.
— 3 Februari 2026
Solo ta sali: 7:05 a.m.



Lista di Crusero di bishita na Aruba

—Diasabra 31 Jan. 2026:

Silver Shadow:
(08:00 until Sun 1st)
AIDAperla:
(09:00 - 21:00)

Caribbean Princess:
(09:00 - 22:00)

—Diadomingo 1 Feb. 2026:

Wind Surf:
(06:00 - 18:00)
Evrina:
(08:00 - 21:00)

Mama ta señala encuanto un acusacion falso contra un menor:

Un caso cu ta lanta pregunta serio riba verificacion y proteccion di mucha

ORANJESTAD(AAN): Recientemente un mama preocupada pa su muchacha cu ta bibe na Aruba a wordo acusa publicamente (riba Social Media) di vandalismo, despues cu un potret di dje a wordo comparti sin verificacion apropiada. E acusacionnan (cu despues resulta falso) a circula rapidamente riba pagina comunitario, causando comentario difamatorio, incluyendo algun cu ta incita violencia contra un menor.

E mama a declara, con un muchacha di 12 años cu ta bibe na Aruba a wordo acusa publicamente (riba Social Media) di vandalismo, despues cu un potret di dje a wordo compartido sin verificacion apropiada. E acusacionnan (cu despues resulta falso) a circula rapidamente riba pagina comunitario, causando comentario difamatorio, incluyendo algun cu ta incita violencia contra un menor.

E muchacha den cuestion ta Daniel Mazzolini, un alumno di 12 años kende ta conoci den comunidad pa su participacion positivo den deporte, di voluntario, medio ambiente y arte.

Loke a socede: Un potret di Daniel a wordo publica na Facebook di Centro di Barrio Dakota y despues comparti pa pagina local 24Ora, acompañando cu acusacion di vandalismo.

E acusacionnan no tabata berdad. Aunke e publicacion original a wordo kita, ningun aclaracion ni rectificacion publico a wordo publica, aunke e imagen y mensahe ya tabata ampliamente compartido.

Hechonan verifica: (*) Daniel a sigui lesnan di Schaak ('ajedrez') tur Diasabra atardi na Centro di Barrio Dakota y ta participa den torneo oficial tur Diahuebs anochi. (*) Su mama, Silvia Mazzolini, ta acompañe regularmente y ta keda ward'e pafu den parkinglot durante e actividadnan.

(*) Riba Diasabra 17 di Januari, Daniel a wordo filma (no fotografia) mientras cu e tabata purba sostene un railing cu tabata los cerca di entrada di e Centro, aparentemente preocupa cu e por cay y lastimar un hende. (*) Mas laat, un otro portret, mustrand

Daniel simplemente canando, a wordo uza pa acus'e di vandalismo. Na ningun momento e tabata haci daño ni accion di destruccion.

(*) E railing di man, pa motivo di mal instalacion y peso, despues a cay door di su mes. (*) Presencia di Daniel na e Centro ta documenta cu lista di asistencia, y tur Torneo di Schaak ta registra oficialmente cu lista di hungadornan y scoring-sheet. (*) No tin ningun evidencia cu Daniel a comete vandalismo.

Acusacionnan ey siendo cu e ta un mucha activo den comunidad, Daniel ta conoci den Aruba pa su participacion constructivo y respetuoso, y tambe ta fungi como voluntario tur siman na The Butterfly Farm. (*) Participacion den proyecto ambiental manera sembra mangelnan banda di lama cu 'Ban Lanta y Planta', actividadnan cu anteriormente a wordo cubri den prensa local. (*) Tambe ta participa constant den limpieza di Playa na Eagle Beach for di tempo e ta un mucha chikito.

Daniel tambe ta: (*) Campeon di Schaak den su categoria di edad, representando Aruba na Curaçao, caminda el a gana medaya cu e seleccion nacional. (*) Participacion activo den comunidad artistico, unda e.o. (*) Daniel a yuda Omaira Silva, un di e artista di mosaico mas respetada di Aruba, señalando tecnica di mosaico riba manera practico. (*) El a wordo observa y stimula den espacio cultural manera Biblioteca Nacional, San Nicolas y durante Paseo Herencia, caminda e tambe a exhibi su propio creacionnan. (*) Omaira Silva a bira un fuente constante di apoyo y motivacion pa su desaroyo artistico.

DIARIO ta mira pues cu e mucha aki ta uno cu mentalidad di yuda comunidad y su prohimio, y no tin ningun nocion di ta un troublemaker of algo asina.

E mama a splica kico e consecuencia ta cu a core publica e video sin verifica prome. Aunke e post original

a wordo elimina, e imagen y acusacionnan ya tabata ampliamente comparti pa perfilnan priva. Comentario online a sigui, algun di nan incitando violencia contra un menor. E situacion aki a afecta profundamente e familia. Aunque Daniel ta sigui cu su les di Schaak, su mama awor ta keda den parkinglot durante henter e duracion di e actividadnan, pa temor pa su seguridad. Corda cu daño causa na reputacion y bienestar emocional di un mucha no por wordo drecha simplemente cu elimina un post.

Un tema di responsabilidad publico: E caso aki ta lanta pregunta importante pa nos sociedad, esta: (*) Obligacion di verifica informacion prome di publica. (*) Responsabilidad di pagina comunitario y medio di comunicacion. (*) Necesidad absoluto di proteha menor, especialmente evitando publica imagen y acusacion sin permiso ni confirmacion factual. (*) Acusacion publico sin verificacion contra un mucha por causa daño emocional y psicologico irreparable, y influencia con hobennan ta mira justicia, confianza y comunidad. (*) Ki mensahe nos ta manda na nos muchanan ora cu cualkier hende por wordo acusa y castiga socialmente sin cu e berdad wordo comproba prome?

Agradecimento: E familia ke expresa su agradecimento publico na Shelly, representante di Federacion di Ahedrez, kende a actua rapidamente y responsablemente, contactando e presidente di Centro di Barrio Dakota y expresando duda serio cu Daniel por ta capaz di tal conducta. Tambe gratitud na Federacion di Ahedrez pa su profesionalismo y apoyo.

Un yamada pa responsabilidad: E familia ta pidi formalmente como lo siguiente: (1) Un aclaracion publico claro y factual. (2) Reconocimiento cu e acusacion original tabata sin verificacion y incorrecto. (3) Respet pa privacidad, dignidad y proteccion di un menor. Tur informacion ta

documenta. E familia ta disponibel pa presenta video, registro di asistencia y declaracion escrito di Federacion di Ahedrez y Centro di Barrio Dakota. E

caso aki no ta solamente tocante un mucha. E ta tocante con un comunidad ta scoge pa proteha su miembronan mas vulnerable.

Fortaleza di Famia

Diasabra 31 Januari 2026

Alcohol ta esclavisa bo curason

Skirbi pa: Pastor Marcel Balootje

Ta tristo pa bisa, pero ta parece cu mescos cu nos ta den temporada halto di turismo, nos ta den temporada halto di uso di alcohol, y no tin distincion, entre hende grandi, hoben, y hasta mucha.

Awor e pregunta ta bini: Kico tin mas balor den bida di hende? Alcohol, bo familia, bo matrimonio, bo cas, bo trabao, bo integridad? Pensa un rato bon y wak e posicion cu alcohol a alcanza den bida di hende, pasobra si tur dia un hende tin cu bebe, e ta esclavo di alcohol, of alcohol ta su Dios.

Pasobra locual ta domina bo mente, ta domina bo bida, pasobra e tin control riba tur locual bo ta haci.

Uzo di alcohol ta contra palabra y voluntad di Dios pasobra Bijbel ta bisa hopi cla den Galationan 5:19-21 cu buracheria lo no drenta reino di Dios.

Antes un muhe burachi tabata un cos di berguensa, pero awor e ta parece un arte, un parti di gran alegria, ta manera comunidad a lubida decencia, ta facil pa bo mira un dama burachi.

Un homber burachi tabata wordo califica como un payaso, pero awor a bira facil pa bo sinti olor di alcohol tur momento, den dia, atardi, merdia, y hasta bao di ora di trabao.

Awor no ta existi un ley cu ta stop hende di bebe, pero tene cuenta cuanto accidente, cuanto morto, cuanto hende tin cu problema fisico despues di accidente burachi cu nan mes a causa, of pa motibo di accidente causa door di hende burachi nan bida a cambia por completo. Cuanto hende no tin un bida traumatiza, pa motibo di alcohol, cuanto hende no a perde, cas, familia, matrimonio, trabao, posicion, pa motibo di alcohol.

Cuanto hoben no ta adicto na alcohol?

Awor nos ta den temporada di Carnaval cual ta e unico fiesta cu bo mester ta burachi pa bo gosa, esey ta un gran mentira pasobra hende burachi no por gosa di nada.

Anja aden año afo tin hende ta sostene caha di gobierno pasobra nan tin cu paga boetnan halto pa nan libertad, y hasta tin biaha huntu cune sinti klop di polis, y trato fuerte pasobra nan ta burachi.

Ta kico mas mester sosode pa wowo di hende por habri?

No por ta agradabel den bista di Dios, ora un hende ta burachi, pasobra e palabra di Dios ta bisa cu nos curpa ta temple di Dios y e Spirito Santo ta bibe den nos.

Ken tin lamento profundo? Ken tin verdriet? Ken tin pleito? Ken tin keho? Esnan cu ta sinti ora nan largo cu biña, esnan cu ta bay pa purba biña mezcla. (Proverbionan 23:29-30) ta papia di bebemento y su consecuencia, pero awor nos ta den un tempo cu hende ta bebe y ta causa daño na otro hende, y na comunidad, cual ta algo hopi doloroso, pa tur dos banda.

Den Genesis 9:20-26 Noe a pasa den berguensa door di bebemento, y den Genesis 20:30-38 ta para skirbi con alcohol a hiba Lot na inmoralidad. (Incest).

Laga nos comporta nos mes, decentemente manera den dia, no den parandamento, y den buracheria, no den inmoralidad sexual, y den sensualidad, no den pleito y envidia. Ma bisti boso cu Señor Hesus Cristo, y no haci provision pa e carni, pa cumpli cu su mal deseonan. (Romanonan 13:13).

Na prome lugar tur hende mester tene cuenta cu nan mes ora nan ta bebe, pa nan no causa daño na nan mes y na otro hende, no causa dolor na nan familia, y perde respet, y dañu relacion y amistad.

Corda pone Cristo Hesus na prome lugar den bo bida, den dj'E tin goso.



Ayudando E Famia na Aruba
Telefon: 740-3237/661-9150.
Email: fortalezapafamia@gmail.com
number di cuenta: CMB. 65779308

DEPORTE INTERNACIONAL

Djokovic a gana Sinner den un bataya epico pa yega final di Australian Open



MELBOURNE: Novak Djokovic porfin a logra gana un di e dos hungadornan cu pa algun tempo caba ta strobe di gana su di 25 titulo di Grand Slam.

Diabierna Djokovic a logra bataya fuertemente den un tremendo partido semi final di Australian Open, pa na final gana Jannik Sinner den 5 set.

E tenista di Serbia awor ta bay hun-

ga e final, mientras cu e campeon di aña pasa ta bay cas.

Djokovic di 38 aña a gana e wega cu e score di 3-6, 6-3, 4-6, 6-4, 6-4.

E wega a cuminsa laat y a termina 01:30 am ora local di Australia.

Djokovic a hunga un tremendo wega defensivo, unda cu el a para 16 di e 18 breakpoints cu Sinner a haya.

Ajax ta casi cla pa firma Maarten Paes y Oleksandr Zinchenko



AMSTERDAM: Ajax ta parce di ta bay ta bastante activo den e mercado di transferencia, den e ultimo dianan cu esaki ta posibel.

E club di Amsterdam ta cerca di firma Maarten Paes y Oleksandr Zinchenko, mientras cu nan tin nan bista tambe riba un hungador Brasileiro di defensa y un Argentino cu ta hunga den hala drechi.

Keeper Paes di 27 aña Diahuebs cu exito a pasa su testnan medico cerca Ajax.

E ta bay reemplaza Remco Pasveer y ta bay firma un contrato di 3 aña y mey.

Zinchenko di Ukraine cu ta hunga den parti drechi di defensa tambe ta bay firma cu Ajax, despues cu Arsenal a duna e permiso pa e ne-

Alcaraz a bataya contra calamber y a logra gana wega maratonico contra Zverev pa bira hungador mas hoben den open era pa yega e final di tur e 4 Grand Slams



MELBOURNE: Carlos Alcaraz a bataya calamber y a logra gana un wega maratonico contra Alexander Zverev pa asina pasa pa e final di e Australian Open.

Alcaraz na apenas 22 aña di edad a bira e hungador mas hoben den e asina yama Open Era, pa yega e final di tur e 4 Grand Slams.

Si e gana e final contra Novak Djokovic, e lo bira e hungador

mas hoben pa gana tur e 4 Grand Slams.

E wega contra Zverev tabata uno cu a dura nada menos cu 5 ora y 27 seconde.

Tabata e semi final cu a dura mas largo den historia di Australian Open.

Na final e wega a caba . 6-4, 7-6, 6-7, 6-7, 7-5 na favor di Alcaraz.

Ademola Lookman na caminda pa Fenerbahçe

TURKIA: Ademola Lookman den zomer cu a pasa tabata tin hopi gana di bay hunga pa Inter, pero su club Italiano Atalanta no a permitie pa bay ainda.

E atacante di Londres di 28 aña ainda tin un contrato cu e club di Bergamo te cu zomer di 2027.

Sinembargo awor tur cos ta indica cu Lookman ta na caminda pa Turkia, pa firma cu Fenerbahçe.

E top club Turco ta dispuesto pa paga Atalanta 40 milyon euro pa tuma over Lookman, kende na 2024 a wordo escogi como e hungador Africano di aña.



Esaki despues cu den luna di Mei el a anota un hat trick den e final di Europa League contra Bayer Leverkusen (3-0) na Dublin.

Lookman ta hunga pa e seleccion di Nigeria y a logra 11 gol y 9 asistencia den 41 wega.



Noticianan for di Hulanda

Hulandes deteni durante razzia Na Roma den lugar di izquierdistanan radical



ROMA: Mustrando nan poder, polis Italiano Diahuebs a pone un fin na ZK Squat, un instituto 'underground' conoci na Roma Italia. Despues di casi 24 aña, un total di 11 activista a wordo saca for di e edificio pa agentenan policial. E personanan aki a wordo deteni. Mey mey di e Italianonan tabata tin un Hulandes, polis a confirma den un comunicado.

Hendenan cu ta biba den vecindario di Nuova Palocco, un barrio

entre Roma y Ostia cu ta na costa, lo a spanta pa wak tur e vehiculo nan di polis yega un tiki despues cu solo a sali.

E edificio cu e agentenan a dreña ya desde 2002 no tabata den mannan mas di e propietario, sino den man di un grupo izquierdista radical, cu a duna e edificio e nomber di 'ZK Squat'.

E movimiento aki ta resisti fuertemente contra violencia di polis y gruponan derechista extremo.

Detencion di evangelista controversial De Wal tabata ilegal



Polis ta bisa cu e tempo ey nan a asisti e municipio door di laga De Wal sa cu su encuentro religioso den un edificio den Appennijnenweg no por a sigui.

Segun e municipio lo tabata

trata di un evento, pa cual no a pidi un permiso.

E municipio a indica tambe cu e edificio no tabata un iglesia tampoco.

Riba 9 di Januari De Wal a bay riba caya y a sigui cu su resamanto, despues di cual polis a detene. Awor polis y OM a yega na e conclusion cu nan no a actua corecto y cu lo no tin consecucionan pe-

TILBURG: E encuentro cu Tom de Wal a tene anteriormente e luna aki na Tilburg, no tabata un evento.

Esaki ta pone cu detencion di e evangelista controversial tabata ilegal.

Ministerio Publico y polis a trece esaki pa dilanti Diahuebs.

Den un carta polis a laga De Wal sa cu e caso contra dje a wordo termina y cu e lo no ricibi un boet.

Hospitalnan den parti noord di Hulanda ta experiencia un luna di Januari druk debi na e weer y tambe griep y adultonan mayor malo



HULANDA: E luna di Januari tabata uno druk pa hospitalnan na Groningen, Drenthe y Friesland. Door cu cayanan y otro lugarnan ta keda slip, varios hende a kibra pia of a haya nan mes den tur tipo di accidente.

Diabierna por ehempel tabata tin basta accidente cu a sosode den e parti noord y noord-oost di e pais.

Den algun di e casonan tabata tin personanan cu a resulta herida, prensa regional a reporta.

Rijkswaterstaat pesey ta adverti tur hende pa ta alerta.

For di 1 di Januari te cu 29 di Januari KNMI riba 21 dia a saca un alerta pa camindanan cu ta slip den e provincianan den e parti noord di e pais.

Homber cu a wordo secuestra na Purmerend a wordo libera pa polis na Amsterdam



PURMEREND: Diahuebs anochi tres homber a secuestra un homber na Purmerend.

Mas laat e mesun anochi el a wordo libera pa polis na Amsterdam.

Polis alrededor di 19:55 a ricibi un melding di un secuestro cu lo a tuma lugar den e barrio Overwhere, unda cu tres homber den un Volkswagen Polo color shinishi lo a comete e acto.

E auto a wordo para pa polis alrededor di 21:10 riba IJdoornlaan na Amsterdam.

E victima den e auto a wordo maltrata.

El a wordo trata pa e heridanan cu el a sufri.

E sospechosonan ta un homber di Purmerend di 18 aña, otro di Purmerend di 20 aña y un homber di Lelystad di 18 aña.

Noticia Internacional

Orden ehecutivo di Donald Trump

Merca lo impone tarifa riba paisnan cu ta bende of suministra petroleo na e regimen Cubano

WASHINGTON: Presidente di Merca Donald Trump a declara un emergencia nacional como respuesta na loke el a yama un “menasa inusual y extraordinario di gobierno Cubano pa seguridad y politica exterior di Merca.”

E medida aki a wordo formalisa den un orden ehecutivo publica pa Cas Blanco, cu ta detaya e motibonan, obhetivonan y alcance di e decision, introduciendo un sistema di tarifanan adicional pa paisnan cu ta suministra petroleo na e isla.

Segun documentacion oficial colecta pa e website di Cas Blanco, e ordo ta sostiene cu Cuba a fortalece lasonan cu paisnan considera adversario di Wash-



ington, incluyendo Federacion Ruso, Republica Popular di China y Iran. E texto a enfatisa cu “e regimen Cubano ta aliña su mes cu y ta sostiene numeroso paisnan hostile, gruponan terrorista transnacional, y actornan maligno contrario na e interesnan di

Merca, incluyendo Hamas y Hezbollah.”

E administracion di Trump a adverti cu e isla ta aloha e base di inteligencia di señalnan mas grandi di Rusia pafo di su territorio, cu ta wordo uza pa intercepta informacion delicado di Merca y realiza actividad-

nan di spionahe.

Varios gobierno di Merca a declara emergencia nacional relaciona cu Cuba, mencionando menasanan militar, riesgonan di migracion masal, y peligran pa seguridad nacional, pero e situacion actual, cu e isla isola y sin e posibilidad di suficiente asistencia di combustibel, ta duna nan un caracter special.

E inclusion di Cuba riba e lista di Patrocinadornan Estatal di Terrorismo a keda pa gran parti di e ultimo 40 añanan, y a bolbe wordo reincorpora pa Gobierno di Trump na januari 2025. E base legal pa e medidanan aki ta data for di 1 di maart 1996, ora cu Bill Clinton a declara un emergencia nacional despues di e deriba-

dos avion civil Mericano, denunciando Cuba su “boluntad imprudente pa uza forza excesivo.” Na 2004, George W. Bush a amplia e declaracion aki a traves di Proclamacion 7757, restringiendo e envio di ayudo economico y material, y conectando esaki na e riesgo di anulacion di e acuerdonan di migracion.

E orden ehecutivo tambe acusa Cuba di profundisa e cooperacion di defensa y inteligencia cu Republica Popular di China.

Segun Cas Blanco, e regimen Cubano ta facilita e establecimiento di capacidadnan militar y di inteligencia sofisticada door di podernan stranhero, loke ta constitui un menasa directo pa seguridad di Merca.

E documento a argumenta cu e regimen Cubano “a provee refugio y sosten na gruponan manera Hezbollah y Hamas, creando un ambiente condusivo na e desaroyo di lasonan economico, cultural y di seguridad di e organisacionnan aki den continente Americano.” Segun e administracion Mericano, e situacion aki ta busca pa “destabilisa e Hemisferio Occidental, incluyendo Merca.”

E orden ehecutivo a instrui creacion di un sistema di tarifanan adicional riba mercancianan di paisnan cu directamente of indirectamente ta suministra petroleo na Cuba.

E mecanismo ta establece cu e Departamento di Comercio lo determina cua nacionnan ta participa den e practica aki y lo notifica e Departamento di Estado pa evalua e imposicion di tarifanan ad valorem riba nan exportacion pa Merca.

Muhe a haya un multa di casi un miyon dollar pa no cumpli cu orden di deportacion

LOS ANGELES: E administracion di Trump a demanda un muher hispano pa no a cumpli cu un ordo final di deportacion y a exige pa e paga un multa di casi un miyon dollar, un di e multanan mas halto conoci impone te awor pa forsa inmigrantenan bandona e pais.

E demanda civil, comparti pa e medio specializa Politico, ta exige pa Marta Alicia Ramirez Veliz paga \$941.114 mas interes pa supuestamente no a logra bandona Merca despues di a perde su caso na 2022.

Den e keho legal, e Departamento di Husticia ta splica cu Ramirez Veliz “debe” Merca e multa pa no cumpli of nenga deliberadamente di bandona e pais pa 24 di april 2025.

Gobierno di Trump a basa



riba un sesion di Ley di Inmigracion y Nacionalidad (INA) cu ta establece cu un stranhero sometido na un orden final di deportacion cu no wordo cumplido of nenga di bandona e pais deliberadamente mester paga un multa civil. E suma ta fiha na 998 dollar pa cada dia di violacion. Segun cu documentonan di Corte, e inmigrante a haya orden pa bandona e pais dia 1 di juli 2019, ora cu un hues di inmigracion a emiti un orden di deport-

acion contra di dje.

E dama a apela na e Junta di Apelacion di Inmigracion (BIA), cu a rechasa su peticion y mantene e deportacion dia 23 di september 2022.

Na april 2025, Servicio di Control di Inmigracion y Aduana (ICE) a notifica e muher di su intencion di dun’e un multa, y e tabatin 30 dia pa presenta un defensa tocante e motibo pa cu e no mester paga un multa.

Segun e demanda, pre-

senta den Corte di Distrito di Merca na Richmond, Virginia, e muhe no a responde, y awor e administracion di Trump a pidi e Corte pa enforsa e boet. For di su prome administracion, Trump a permiti ICE impone boetnan di te cu mey miyon dollar.

Charles Moore, un abogado di Husticia Publico, a bisa Politico cu e multa riba Ramirez Veliz aparentemente ta e suma mas halto cu e yega di wordo imponi.

Noticia Internacional

Ex-presentador di CNN Don Lemon a wordo deteni pa supuestamente protesta contra ICE na Minnesota



Ex-presentador di CNN Don Lemon a wordo aresta despues di a drenta un misa di Minnesota algun dia pasa y a filma un grupo di manifestante manifestando contra e politicanan di inmigracion di e administracion di Trump, strobando un servicio religioso.

Lemon, kende actualmente ta un periodista freelance, a wordo aresta pa agentenan federal diahuebs anochi na Los Angeles, unda e tabata cubri e proximo

Grammy Awards, segun su abogado, Abbe Lowell. “Don lo bringa e acusacionnan aki cu firmesa y determinacion den Corte,” Lowell a declara. Lemon, di 59 aña, a presenta den Corte Federal na Los Angeles riba diabierna. E periodista a drenta misa di Cities na St. Paul dia 18 di januari cu un grupo di manifestante cu a afirma cu un di e pastornan tabata un funcionario di Inmigracion y Aduana (ICE).

Polis di Brasil a detene un sospechoso vincula na Estado Islamico cu tabata preparando un atake suicida na São Paulo

Polis Federal di Brasil a detene diahuebs un homber den interior di e estado di São Paulo, sospecha di a prepara un atake suicida y mantene lasonan cu e grupo terrorista Estado Islamico (ISIS), den un operacion cu a conta cu cooperacion di autoridadnan Mericano.

E detencion a tuma lugar den e ciudad di Bauru, mas o menos 330 kilometer for di e capital di São Paulo, y ta forma parti di un investigacion cu ta andando dirigi pa evita un posibel atake riba territorio Brasileiro.

Segun e declaracion di autoridadnan, e homber “tabata envolvi den actonan preparatorio pa e montahe di un chaleco cu explosivo destina pa e practica di un atake terrorista suicida riba territorio nacional.”

E agentenan a confisca ma-



terialnan cu lo a wordo uza pa fabricacion di explosivo y a haya acceso na datonan electronico y comunicacionnan di e sospechoso, cu autorisacion hudicial previo.

E investigacion andando tabata basa riba informacion inicial suministra pa e Oficina Federal di Investigacion di Merca (FBI). Fuentenan policial a indica cu e vigilancia di e sospechoso a cuminsa aña pasa, despues di señalnan di radicalisacion y supuesto contactonan cu mi-

embronan of simpatisantenan di Estado Islamico.

E homber a wordo deteni riba acusacion di “actonan preparatorio di terrorismo” y pa “pertenece na un organizacion terrorista internacional”.

Brasil, cu te awor no tabata e escenario di atakenan yihadista na gran escala, a aumenta e cooperacion internacional den inteligencia contraterorismo den e ultimo decada, specialmente desde cu nan a organisa e Weganan Olimpico di Rio na 2016.

Embahadanan na Europa y Latino America a activa plannan di evacuacion pa bandona Cuba den corto plazo

Embahadanan y companianan internacional na Cuba ta revisando nan plannan di contingencia y evacuacion despues di presion di Washington riba e isla despues di e captura di Nicolás Maduro na Venezuela dia 3 di januari.

E preocupacion a escala den e ultimo simannan den e circulonan diplomatico y empresarial exterior den medio di un incertidumbre geopolitico creciente den Caribe y e posibilidad cu Merca hasta por ta preparando un intervencion militar na Cuba, manera a wordo confirma na e agencia di noticia EFE pa casi un dozijn di pais Europeo y Latino Americano cu ta prefera di keda anonimo.

E caso mas destaca den e sector priva ta esun di e multinacional Britanico Unilever, cu ya a evacua e

famianan di su trahadonan stranhero den e pais, manera a confirma na EFE pa dos fuente cerca di e compania, cu ta fabrica productonan di higiena, beyesa y limpieza riba e isla.

E decision di e compania ta refleha e nivel di alarma bao di e corporacion internacional cu operacionnan den territorio Cubano, caminda e combinacion di menasanan geopolitico y colapso economico ta creando un escenario sin precedente den decadanan.

Misionnan diplomatico ta actualisando nan plannan di evacuacion y listanan di ciudadanonan residencia na Cuba, tin biaha yamando nan ciudadanonan un pa un pa verifica e informacion.

Algun embahada ta acaparando suministro pa wanta periodonan largo sin cori-

ente, combustibel y awa, eventualidadnan cu nan ta compronde por sosode debi na e combinacion di contexto actual di crisis total riba e isla y e presion creciente di Merca.

Entre e sector priva, varios filial di companianan internacional contacta pa prensa a reconoce den priva, cu e incertidumbre geopolitico a pone nan reconsidera nan actividad na Cuba. E dos motibo cu nan ta menciona ta un potencial intervencion militar Mericano, pa mas chikito cu e por ta, y e impacto riba nan actividad di e deterioro economico serio di e pais, specialmente cu e aumento di blackout y scarcedad critico di combustibel.

Algun compania internacional a asegura cu nan tin un reserva di combustibel




pa nan operacionnan di fabricacion, pero ta adverti cu si e cargamentonan for di Venezuela y Mexico wordo corta definitivamente, mantencion di produccion lo ta insostenibel. Tur esaki ta sosode den un contexto caminda Donald Trump a firma un orden ehecutivo pa impone tarifa adicional riba mercancia importa for di paisnan cu ta bende of suministra petroleo na e regimen Cubano. E obhetivo ta pa

proteha e interesnan strategico di Washington contra loke e presidente di Merca ta considera “accionnan maligno” di Havana riba escenario internacional.

E crisis energetico cu e dictadura Cubano ta enfrenta a alcanza nivelnan critico. Segun datonan di e consulta Kpler publica pa Financial Times, Cuba tin suficiente reserva di petroleo pa apenas 15 of 20 dia.

Funcionario Richard Krammers:

CEA ta encarga pa kita y pone banchi na enkel na detenidonan cu bin na remarca pa haya un



ORANJESTAD (AAN): Director di CEA, señor Richard Krammers a duna explicacion tocante e sistema di monitoreo electronico, Justice "Buddi" específicamente riba e banchi di pia. El a remarca cu un grupo selecta a haya training con pa pone y

kita e enkel band na un detenido. E banchi di enkel ta pa evita cu e detenido bay cera na KIA.

El a splica du den caso cu un persona no cumpli cu e condicionnan, CEA ta haya notificacion for di Reclasering cu e persona aki lo



a sali for di e area y ta bay den areanan cu e no ta permiti pa bay. Den e caso aki, personal di CEA ta tuma contacto cu e detenido, sea personal of via telefon, y ta hala su atencion y indic'e cu el a sali for di su area. Si e situacion escala, lo inclui cuerpo policial.

"Pa awo, CEA ta haya notificacion for di Reclasering, cu na su banda ta haya notificacion di e compania na Inglatera. Poco poco nos ta haya mas autorisacion pa monitoria despues cu e proyecto piloto caba", el a expresa.

Señor Krammers a duna di conoce cu e persona cu haya un banchi di enkel, Reclasering y Hues Comisario ya a combersa cu ne y a splic'e e condicionnan di esaki y cu e banchi di enkel ta na luga di bay prison. Segun e, e persona lo coopera conscientemente cu e banchi y no ta wordo forsa pa uz'e. Por lo tanto, segun señor Krammers, e chens ta chikito cu e no lo atene su mes na e condicionnan. Den caso cu e no cumpli, e persona lo mester bay KIA.

"Esaki ta un proyecto cu ta den tramite pa hopi aña caba. Reclasering ta e motor tras di esaki y CEA ta duna su aporte. Nos ta sinti cu e ta algo hopi bon pa nos hobennan especialmente cu alavez ta haya oportunidad di ricibi guia pa nan no cay bek den man di husticia", señor Krammers a expresa.

Aurora
Royal Pray
Funeral Home & Crematory

Cumana # 76 & # 44
van Speyckstraat # 1
Oranjestad, Aruba
T.: (297) 588-6699
E.: info@aurorafuneralaruba.com

Cu dolor profundo pero gradicido cu e no a sufri durante e periodo cortico di kibrante di salud nos ta anuncia cu a bay laga nos:



Charles John Fingal

24 September 1946 – 26 Januari 2026

Tin e oportunidad di despidi di dje y condoleer na:

Aurora Funeral Home:

Februari 3, 2026 desde 12:30 pm te cu 3:30 pm.

Despues lo tin e ceremonia di despidida.

Maske awor tin tristesa su memoria ta un tesoro.

Mark y Michelle
Mirtha
Primo y primanan
Sobrino y sobrinanan

Demas famia: Fingal, Hek, Maduro, Tromp,
Cohen-Henriquez, Wong, Evertsz, Leijenaar,
Henriquez y Werleman.

Amigonan di: Diabierna Lunch, Los Laga Bai,
Roadside y demas amistades.

Nos disculpa si den nos tristesa nos a lubida
cualquier number di famia of conosi.

Despues di acto di despidida no lo risibi bishita di
condolencia na cas.

**Ta aprecia un donacion na Koningin Wilhelmina
Fonds.**

Aurora
Royal Pray
Funeral Home & Crematory

Cumana # 76 & # 44
van Speyckstraat # 1
Oranjestad, Aruba
T.: (297) 588-6699
E.: info@aurorafuneralaruba.com

Ki alegria, ora nan a bisa mi:
"Ban cas di Señor!"
I awor, ata mi aki para na bo porta Señor.
Salmo 122

Cu inmenso dolor na nos Curason
nos ta anuncia fayecimento di Nos
Tata:

Sixto Mercelino Coffy
Mihor conoci Como "Lulu"
*06-04-1940 - †22-01-2026



Na number di su:

Yuinan

Hildegard Gertrudes Coffy

Sevacia Valeria Sixta Nugter-Coffy y Esposo Mathijs Nugter

Nietanan

Srta. Noelle Julie De Jonge y Srta. Susette Gill De Jonge

Rumanan

Pio Augustin Coffy y Irene McMillan na Scotland

† Agapina "Chichi" Coffy

† Eugelio "Buchi" Coffy i Esposa † Reineta Coffy-Koolman

† Luciano "Jani" Coffy

† Cristobal "Coffy" Coffy

† Anita "Chima" Angela -Coffy y Esposo † Mariano Angela

† Luis Coffy y Sra. Viuda Vera Coffy-Hart na Boneiro

Subrina y Subrino nan

Ramon Coffy y Famia

Esther Iraida Coffy

Javier Coffy

Alexandra Coffy y famia

Polycarpo G. Angela

Ingeborg Coffy y famia na Boneiro

Shireen Coffy y famia na Boneiro

Jenerette Coffy y famia na Boneiro

Jordan Coffy na Boneiro

Robin C. Angela y famia

Tur demas famianan, mucho hopi pa menshona

Amigo/Amigonan:

Juancho, Ruth y Silvana Havekes

Gradicimento na E team di Enfermero y voluntarionan
Fundashon Hospice Atardi

Si den nos dolor nos por a lubida pa menciona algun persona.
Nos ta pidi disculpa pa esaki.

**Acto di condolencia y entierro ta tuma lugar diasabra, 31
Januari 2026 na Aurora Funeral Home Oranjestad di 2or pa
4or di atardi y despues lo sali pa Santana Central na Sabana
Basora.**

Pa chica Pos - Habri tuberia y wc.
Servicio lihe y confiabel.
 Experiencia ta manda
CICLONE
 Septic Tank Service
Tel: 564-0607 / 734-0607

PROMASTER
 Pa laba tapijt, sofa,
 tur matras.
 99% desinfecta.
Tel: 582-0383 / 593-3538
 Leslie Maduro

AIRCO REPAIR & SERVICE
 Nos ta drecha tur sorto di:
 Airco, frigidaire,
 wasmachine, dryer, stove,
 horno, cooler y freezer.
 Yama nos na 650-9982

TA FURA
ELMA UPHOLSTERY
 Matras, box busca mainta y
 haye atardi! Set di sala, tv
 chair, sienta auto.
Tel: 565-5577
 Macapruimstraat # 1L

CONSTRUCCION
REMODELACION
 Nos ta traha y drecha tur sorto
 di dak: shingle, eterniet, panchi,
 zink. Pega bloki, tegels, plafond,
 pleister, pone porta, lanta cura,
 basha vloer, construccion di cas
 y apto bon prijs. Free quotation.
Tel: 561-2137

SUSHI
 Ta piki sushi lage limpi
 limpi mane un soño.
 yama pa calculacion.
 Arubiano trahado.
 592-5766 of 561-5179

Chapi, verf, tira sushi
Ecotech, plumbing,
construccion,
jardineria, mantencion,
handyman.
WHATSAPP: 561-1397

REAL ESTATE
Bende bo Cas
of Tereno.
YAMA NOS 593-8082

TA CHAPI Y
TIRA SUSHI AFO
TRANSPORTE
Cel: 594-5115

HUUR
 Ta busca Cas y Apt.
 Pa nos clientela.
YAMA: 593-8082

AUTO
 Ta cumpra of
 bende bo auto.
YAMA: 593-8082

Team Snor a habri aña cu bon pia



ORANJESTAD (AAN): - Diasabra ultimo, 24 di januari 2026, e palacio di pega piedra aya na Kudawecha, esta e mundialmente famoso Domino Square Garden, a tene nan prome bataya di aña 2026. Ta trata nada menos di un encuentro entre dos team hermano, esta Team Snor bou liderazgo dje flamante “Snor” Perez, y Pluma Gang, un ekipo cu lasonan hopi cerca cu Team Snor.

E bataya ta habri estilo

“vuurwerk” ora e koki di Domino Square Garden hunto cu su patna “Hermans” ta pasa nan contrincante un sapato blanco! Un brasamento sin fin den nan celebracion di a pasa e prome “sneeuw witje” di 2026! Tension entre ambos ekipo a bay halto di biaha! Sinembargo, cu tur calma, Snor ta pika dilanti cu 4-1! Pluma Gang ta haci nan best pa corta bentaha, pero toch Team Snor ta mantene cos na 6-4. Ora score yega na 9-5, ta birando bisto cu e sla inicial ainda ta pisa, y cu aki Team Snor lo yega halftime cu bentaha. Dicho echo, ora pito zona pa termina prome parti, Team Snor tin un bentaha “comfy” di 11-6!

Despues di a savoria e pasapalonan completamente gratis, e lucha ta sigui den tur intensidad! Pa Team Snor dado momento cos a bira style di “even schrikken”, ya cu nan a observa cu Pluma Gang a haci varios cambio tactico! Pluma gang ta logra corta bentaha te na 14-12, y aki

ta caminda cu e capitan di Team Snor, e grandmaster den tactica gradua na school di spion na Berlin,

a haci poco “schuifmento” cu su hungadonan y a logra “tweak” Team Snor bek na “time” p’e core smooth smooth! E atmosfera ta bira diki cu anticipacion y adrenalina ora score bira 19-16 pa Team Snor, y aki ta caminda e test grandi pe bañonan di Domino Square Garden ta cuminsa ora varios valve ta laga bay bou presion! Sinembargo, na un manera calmo estilo James Bond, score ta gatia bay na 20-16 na fabos di Snor, y pa alivia tur ansha, Roy Sneek y Dr. Tico Dirksz ta los e grito di victoria ora nan logra pasa 21-16! Ora un y tur di Team Snor a lanta foi mesa, nan a ripara cu nan mester tin cuidao ora di cana, ya cu e vloer a keda pata pata di pluma chikito riba suala! Sinembargo, como dos team rumen, e mamamento di guy a bay den bon forma, y all in all, shonnan, e temporada 2026 n’e palacio di pega piedra ta musta di ta bay ta uno exitoso y emocionante!

Cu tristesa nos a tuma nota di fayecimento di



Sr. Marcel Kok

Na bida fundador di Kok Optica

Nos ta desea yiunan;
 Frans y Charles
 Alexandra
 Rudolph
 y demas famia
 hopi forsa den e dianan dificil aki

Arubaanse Optiek & Optometrie Vereniging
(A.O.O.V.)

Optica Moderna
 Optica Leslie
 The Specialist
 Kly Eyecare
 Intermezzo Optica
 Precision Optica

NOS TA DRECHA
 Frigidaire,
 wasmachine, dryer,
 airco, cooler.
Tel: 566-4366

TA BUSCA
 Dama responsabel pa haci
 trabao di cas. Dos biaha
 pa siman. Mester tin su
 propio transporte. Yama
 of whatsapp 593-7329.

TA BENDE
 Algun mata di cas.
 Barata y den nan potchi
 bunita. Yama of
 whasapp 593-7329.
 No tin delivery.

SUPER CARD SUPER DEALS



COMFORT
CLASS

IMAX

VIP

Monday
Thursday

8.00^{AWG}

10.00^{AWG}

11.00^{AWG}

Friday
Sunday

9.00^{AWG}


11.00^{AWG}

12.00^{AWG}

**BEST CINEMA AT
THE BEST PRICES!**

Sign up today at any **The Movies location**
and **start enjoying great benefits!**

Studiantenan di International School cu a bay riba High Honor Roll



ORANJESTAD (AAN):
Durante siman, Interna-
tional School of Aruba a
divulga e lista di alum-
nonan cu a logra puntua-
cion halto den prome Se-
mester.

E asina yama ‘High
Honor Roll Awards’ ta ser
presenta pa honra studi-
antenan di klasnan 7 te cu
12, di a logra puntuacion
no menos cu 90% (A)
den tur vak importante di
cada semester.

E studiantenan cu a logra

bay riba High Honor Roll
ta pa Grado 7: Bhavesh
Mirchandani. Pa Grado 8
tin: Annalise Atzbach, Ar-
maan Daryanani, Aryan
Daryanani, Mayah Mar-

celino, Audrey Pena, Fed-
erica Perret-Gentil van
der Dijs, y Matias Ponce
Budic.

Pa Grado 9 tin: Neyah
Keam, Amanda Lee,

Hannah Lauren Wijnen,
y Ricardo Gonzalez Gon-
zalez. Pa Grado 10 tin:
Ayaz Ceviz y Thainara
Luis Rosa.

Pa Grado 11 tin: Pau-

lina Perret-Gentil van der
Dijs, y tambe Valentina
Ponce Budic. Pa Grado
12 tin: Krish Alwani,
Aashish Modyani, y Kai
Winklaar.

Gemeenschappelijk
Hof van Justitie

Werving & Selectie

Het Gemeenschappelijk Hof van
Justitie, vestiging **Aruba**, zoekt
enthousiaste kandidaten voor de
functie van **(Senior)**
Gerechtssecretaris Belastingrecht.



Bent u geïnteresseerd?

Voor meer informatie, scan de QR-code of
bezoek ons sollicitatieportaal:
Werken bij het Hof op www.ghvj.org.



LUCKY GROUP OF STORES

mabe
4 BURNER
GAS STOVE

20
INCH

SPECIAL PRICE
495.00



SAMSUNG
WASHER & DRYER (2 IN 1)
COMBO

09
KG

SPECIAL PRICE
1729.00



SAMSUNG
TOP MOUNT
REFRIGERATOR

DIGITAL
INVERTER
TECHNOLOGY

19.5
CUFT

SPECIAL PRICE
1989.00



DAIKIN
SPLIT UNIT AIR CONDITIONER

12000
BTU
110V

GL
Series

INVERTER

SPECIAL PRICE
929.00



mabe

4 BURNER
GAS STOVE

24
INCH

SPECIAL PRICE
749.00



SANKEY
WINDOW UNIT

8000
BTU
110V

775.00

12000
BTU
220V

875.00



LG
Life's Good

6 BURNER GAS STOVE

- Air Fry
- Slow Cook
- Convection Oven
- Self Clean

30
INCH

SPECIAL PRICE
2949.00



Hisense
CHEST FREEZER

25
CUFT

SPECIAL PRICE
2289.00



LUCKY ELECTRONICS HAVENSTRAAT #27 TEL:-582-9630 / 6610420

GoPro
Be a HERO

HERO 13

661-0420

FUJIFILM
instax
mini 12



661-0420

Buy the Most
Romantics gifts
from
Lucky Electronics
this
Valentine
Day

SAMSUNG
GALAXY A07



Special
Price
\$149

APPLE IPHONE 17



661-0420

APPLE WATCH SE 3



661-0420

Carnival Item



SPECIAL PRICE
1.95

Valentine Item



SPECIAL PRICE
4.95

Bar Stool



SPECIAL PRICE
125.00

LED Light Beer Mug



SPECIAL PRICE
5.95

Heart



SPECIAL PRICE
2.95

**Teddy Bear
Stick**



SPECIAL PRICE
6.95

Beach Umbrella



SPECIAL PRICE
28.95

Folding Stool



SPECIAL PRICE
16.95

SPECIAL PRICE
22.95

Valentine Item



SPECIAL PRICE
5.95

Plant



SPECIAL PRICE
115.00

Folding Table



SPECIAL PRICE
69.95

Tent

3m x 3m



ANTES
195.00

AVOR
160.00

LUCKY SUPER STORE
JOHN G EMANSTRAAT #71 TEL:-582-3001

LUCKY FAMILY STORE
SAVANETA #490 TEL:-582-0034

LUCKY ELECTRONICS
HAVENSTRAAT #27 TEL:-582-9630